



ESTATUTOS NACIONAIS
13º CONGRESO

ÍNDICE

DISPOSICIÓN XERAIS

Capítulo. I. Principios Organizativos Comúns

Capítulo. II. Procedemento de Elección dos Órganos do PSdeG-PSOE

TÍTULO. I. AFILIADOS E AFILIADAS

Capítulo. I. Afiliados e Afiliadas

Capítulo. II. Militantes

Capítulo. III. Afiliación directa

Capítulo. IV. Simpatizantes

TÍTULO. II. ASOCIACIÓN E COLECTIVOS

TÍTULO. III. ESTRUCTURA DO PARTIDO

Capítulo. I. Estrutura Xeral

Capítulo. II. Agrupacións Municipais e de Distrito

Capítulo. III. Agrupacións Comarcais

Capítulo. IV. Agrupacións Provinciais

Capítulo. V. Organizacións Sectoriais

TÍTULO. IV. ORGANOS NACIONAIS DO PARTIDO

Capítulo. I. Congreso Nacional Galego

Capítulo. II. Comité Nacional Galego

Capítulo. III. Comisión Executiva Nacional Galega

Capítulo. IV. Consello Territorial

Capítulo. V. Comisión Nacional de Listas

Capítulo. VI. Comisión Nacional de Ética

Capítulo. VII. Comisión Nacional de Control Económico

TÍTULO. V. EXPEDIENTES DISCIPLINARIOS

TÍTULO. VI. CONFERENCIAS

TÍTULO. VII. CONSULTAS Á MILITANCIA

TÍTULO. VIII. ADMINISTRACION E PATRIMONIO DO PARTIDO

Capítulo. I. Disposicións Xerais

Capítulo. II. Patrimonio do Partido e a súa xestión

Capítulo. III. Dos Poderes

Capítulo. IV. Presupostos, recursos económicos e contabilidade

Capítulo. V. Cotas

TÍTULO. IX. PROCEDEMENTOS ELECTORAIS

Capítulo. I. Selección de candidatos e candidatas

Capítulo. II. Comisión Nacional de Garantías Electorais

TÍTULO. X. CARGOS PÚBLICOS DO PSdeG-PSOE

TÍTULO. XI. GRUPOS POLÍTICOS DO PSdeG-PSOE

Capítulo. I. Grupo Parlamentario

Capítulo. II. Grupos Nas Corporacións Locais

TÍTULO. XII. XUVENTUDES SOCIALISTAS DE GALICIA

DISPOSICIÓN ADICIONAIS, TRANSITORIAS E FINAIS

DISPOSICIÓNS XERAIS

CAPÍTULO I. PRINCIPIOS ORGANIZATIVOS COMÚNS

Artigo 1.

1. A denominación do Partido é a de Partido dos Socialistas de Galicia-PSOE. As súas siglas son as de PSdeG-PSOE. Os seus emblemas son a zafra, o tinteiro, a pluma, o libro e a rosa.
2. O seu símbolo é un cadrado co puño e a rosa acompañado das siglas PSdeG-PSOE.



3. A sede Nacional está situada na rúa do Pino, 1-9 baixos, CP 15704, Santiago de Compostela, A Coruña.
4. A páxina Web do PSdeG-PSOE é www.psdeg-psoe.com, e a súa dirección de correo electrónico ceng@psdeg-psoe.com.

Artigo 2.

1. O Partido dos Socialista de Galicia é unha organización política galega que, de conformidade co artigo 6 da Constitución Española, concorre á formación e manifestación da vontade popular como instrumento para a participación política, que representa á clase traballadora e ós homes e mulleres que loitan contra todo tipo de explotación e desigualdade, aspirando a transformar a sociedade para convertela nunha sociedade libre, igualitaria, plural, solidaria e en paz, que loita polo progreso dos pobos, en base a un proxecto político progresista, socialista e galeguista, promovendo a modernización, adecuación da nosa organización, tendo como base a confianza, transparencia e participación democrática.
2. O Partido recolle as diferentes correntes de pensamento e opinión socialista e galeguista e respecta no seu seo a liberdade de ideas e de expresión de todos os seus membros, que terán dereito a ser elixidos en calquera proceso orgánico realizado internamente para representar á corrente que pertenza.
3. O Partido dos Socialistas de Galicia é unha federación do PSOE, con autonomía para desenrolar o seu labor no País Galego e na Galicia Emigrada. Configúrase como un instrumento de desenvolvemento da personalidade da nacionalidade galega e de defensa dos seus intereses.
4. Os seus obxectivos e programas, baseados na defensa dos intereses xerais de Galicia, da súa cultura, lingua e identidade, dende a cooperación e solidariedade cos demais pobos de España, son os fixados na súa declaración de principios e nas resolucións dos seus Congresos.

Artigo 3.

A organización do Partido inspírase nos seguintes principios:

1. A democracia como forma de participación efectiva e corresponsabilidade dos e das militantes na vida do Partido.
2. O respecto á liberdade de conciencia e á liberdade de expresión de cada militante no seo do Partido. Garántese a total liberdade de discusión interna, tanto a cada afiliado/a individualmente como a través das diferentes correntes de opinión formadas polo conxunto de afiliados/as que manteñan os mesmos criterios e opinións, que poderán expresarse a través dos distintos ámbitos da Organización e polas canles establecidas nestes Estatutos. Non se permitirá a formación de tendencias organizadas.
3. O cumprimento das decisións adoptadas polos órganos competentes do Partido.
4. A concepción federal da Organización, entendida como integración das colectividades que a compoñen, baseada na autonomía dos seus órganos dentro das competencias que estatutariamente lles corresponden.
5. A unidade do Partido descansa, esencialmente, na unidade de pensamento fundamental que se contén no seu Programa Máximo, nas Resolucións dos Congresos e na unidade de acción dos seus militantes cara á sociedade.
6. Entre o Programa Máximo e a acción política media o ancho campo dos programas transitorios e sectoriais, así como a definición de estratexias e tácticas para levalos a cabo. Sobre todo isto pode e debe recaer o permanente exame e debate no seo da Organización a través das canles estatutarias establecidas.
7. Corresponde aos órganos que representan a toda a Organización, en cada un dos niveis, decidir e fixar, dentro da órbita das súas competencias, as resolucións que fixan a posición do PSOE, así como marcar as directrices que levarán a cabo, e concretar os órganos executivos, poñéndoo en práctica co apoio e cooperación dos cargos públicos electos e de toda a militancia.

Artigo 4.

1. As Correntes de Opinión constituiranse exclusivamente no ámbito Federal.
2. Considerarase Corrente de Opinión o conxunto de afiliados e afiliadas que participa dos mesmos criterios políticos, dentro do respecto aos Estatutos, Programas e decisións dos órganos de Goberno do Partido, desenvolvendo a súa actividade no seo do Partido.
3. As Correntes de Opinión deberán poñer en coñecemento dos órganos executivos as súas actuacións, e moi en particular a documentación froito da súa reflexión e traballo para o seu coñecemento pola Organización.
4. As reunións deberán realizarse nos locais do Partido. Os afiliados e afiliadas que participan nos traballos dunha corrente de opinión coidarán de que non transcenda ao exterior da

Organización expresións contrarias ás resolucións dos Congresos e demais órganos de dirección.

CAPÍTULO II. PROCEDEMENTO DE ELECCIÓN DOS ÓRGANOS DO PSdeG-PSOE

Artigo 5.

Os órganos de representación serán elixidos de acordo ós seguintes criterios:

5.1. Elección dos órganos Executivos

a) As Comisións Executivas Municipais e de Distrito serán elixidas polo sistema de voto maioritario, mediante voto individual, directo e secreto da militancia en listas cerradas e bloqueadas.

b) As Comisións Executivas Nacional e Provinciais e serán elixidas polo seguinte sistema:

-Elección do Secretario/a Xeral

Realizarase a través do sistema de primarias, por voto individual, directo e segredo dos e das militantes e, no seu caso, dos afiliados e afiliadas directas, que teñan plenos dereitos políticos, conforme ó regulado nas normas do Partido. Todos o procesos de primarias deberán rexerse por normas análogas, que favorezan a presentación de candidatos e candidatas e velen pola igualdade de medios e recursos, pola imparcialidade da organización, pola liberdade e pola transparencia durante todo o proceso.

As primarias celebraranse polo sistema de dobre volta. Na primeira volta, resultará elixido/a Secretario Xeral o candidato/a que obteña máis do 50% dos votos válidos. Se houbera máis de dúas candidaturas proclamadas e ningunha obtivese máis do 50% dos votos válidos na primeira volta, pasarán á segunda volta as dúas candidaturas que obteñan o maior número de votos, na que resultará elixido/a Secretario/a Xeral o candidato/a que obteña maior número de votos.

Para lograr a consideración de candidato/a á Secretaría Xeral do PSdeG-PSOE, será necesario conseguir os avais do 2% dos militantes e afiliados directos do Partido en Galicia; porcentaxe que no ámbito provincial será do 3%.

No caso de que só unha precandidatura consiga o número mínimo de avais requirido, o órgano verificador de avais procederá a súa proclamación como Secretario/a Xeral sen necesidade de votación.

Os únicos efectos de verificación dos avais necesarios para poder presentar a súa candidatura á Secretaría Xeral, as precandidaturas poderán aportar diante do órgano verificador dos avais, como máximo, o dobre do número de avais requiridos para obter a condición de candidato/a, tan só coa finalidade de chegar ó mínimo establecido pola posible anulación de parte dos avais presentados.

O órgano verificador dos avais será a Comisión Nacional de Ética nas primarias de ámbito galego e, tamén, nas primarias de ámbito provincial.

No proceso de validación de avais, no caso de aqueles avais que resulten nulos por avalar unha mesma persoa a varios candidatos, a Comisión Nacional de Ética poderá establecer os procedementos de comprobación que estime oportunos, por se fose necesario que o órgano pertinente depurase responsabilidades.

Para unha maior imparcialidade nos procesos de primarias, os e as candidatos/as e os representantes designados pola candidatura que ocupen postos orgánicos en comisións executivas, durante os procesos de primarias, quedarán suspendidos do seu cargo, quedando delegadas automaticamente as súas funcións na persoa ou órgano que as normas prevexan que os substitúen nas súas funcións temporalmente.

O Comité Organizador das primarias garantirá o procedemento e a súa limpeza, supervisado pola Comisión Nacional de Ética. Fixará claramente as diferenzas entre precandidatos/as e candidatos/as, a organización das súas actividades, o uso das sedes, a colaboración do persoal traballador do partido e a financiación das campañas.

-Elección das Comisións Executivas Provinciais e Nacional

A elección das Comisións Executivas Provinciais e Nacional levarase a cabo mediante sistema maioritario, a proposta do/a Secretario/a Xeral elixido, por voto individual e segredo dos delegados e delegadas, con dereito a voto no respectivo Congreso-

As substitucións dos membros das Comisións Executivas Nacional e Provinciais, producidas entre congresos, serán cubertas polo Comité correspondente a proposta do/a Secretario/a Xeral.

5.2. Elección doutros órganos

a) Elección dos Comités Provinciais e Nacional

Elección no respectivo Congreso

Os membros dos Comités Provinciais e Comité Nacional serán elixidos, no número que corresponda, polos/as delegados/as dos Congresos en listas completas, cerradas e bloqueadas, que deberán ter igual representación de homes e mulleres ordenados de forma alternativa. Cando o número de integrantes da lista sexa impar, a presenza de ambos sexos será o máis axustada posible o equilibrio numérico, respectándose a orde alternativa entre os candidatos de un e outro sexo.

No suposto de que existan dúas listas, a minoría que obteña como mínimo o 20% dos votos válidos a candidaturas, terá unha representación proporcional a estes. En todo caso, a lista que obteña a maioría terá dereito á metade máis un dos delegados e delegadas a elixir.

No suposto de que existan máis de dúas listas, e ningunha obteña a maioría, a máis votada terá dereito a unha representación da metade máis un dos cargos a elixir,

repartíndose o resto proporcionalmente entre as demais candidaturas que superasen o 20% dos votos válidos.

Elección dos membros dos Comités Provinciais e Nacional

A elección dos membros dos Comités Provinciais e Nacionais realizarase conforme ó que se estableza no Regulamento de desenvolvemento dos Estatutos Federais aprobados no 39º Congreso Federal. Mentres este non entre en vigor, en aplicación das disposicións transitorias primeira dos Estatutos Federais e terceira, destes Estatutos, a súa elección efectuarase conforme ao previsto nos estatutos Nacionais e Provinciais anteriores ó 39º Congreso Federal.

b) Elección de delegados e delegadas aos Congresos, e Participantes nas Conferencias:

Serán elixidos/as mediante o voto individual, directo e segredo dos e das militantes do PSdeG-PSOE, que teñan plenos dereitos políticos, conforme ó regulamento correspondente. Aos distintos Congresos non poderán asistir como delegados/as os membros das respectivas Comisións Executivas.

A delegación resultante da votación deberá ter igual representación de homes e mulleres. Cando o número de integrantes da lista sexa impar, a presenza de ambos sexos será o máis axustada ao equilibrio numérico.

- c) O Partido pronunciarase pola democracia paritaria entre homes e mulleres e, en consecuencia, adopta o sistema de representación equilibrada en virtude do cal ningún sexo teña menos do 40% ni máis do 60% de representación en calquera órgano de dirección, control ou executivos do Partido, incluídas, a dirección e portavoces das comisións, e os cargos cuxo nomeamento recae non grupos socialistas nas institucións. Calquera excepción a esta norma deberá ser autorizada polo órgano competente, previo informe motivado.

Artigo 6. Da censura do Secretario/a Xeral e das Comisións Xestoras

1. Da revogación dos /as Secretarios/as Xerais

a) Ó inicio do proceso de revogación ou censura dun/dunha Secretario/a Xeral requirirá ser motivado e acordado, mediante votación secreta, por un mínimo do 51% dos votos do Comité correspondente. Adoptado o acordo de inicio do proceso de revogación, a remoción da persoa titular da Secretaría Xeral deberá ser aprobada pola militancia e afiliados/as directos/as do respectivo ámbito nunha consulta que deberá celebrarse no prazo dun mes dende a adopción do acordo de censura polo Comité correspondente. No caso de que a remoción sexa decidida na consulta pola maioría dos votos emitidos, producirase o cese da correspondente Comisión Executiva, nomeándose inmediatamente unha Comisión Xestora polo Comité competente.

b) As Comisións Xestoras que resulten do procedemento anterior, terán un mandato limitado a, como máximo, un prazo de 90 días, dende o seu nomeamento, tendo como misión exclusiva nese período a organización do proceso de primarias e a organización do Congreso

que, no seu caso, dea lugar á elección dun/dunha novo/a Secretario/a Xeral e unha nova Comisión Executiva. A Comisión Xestora só poderá adoptar, dende unha posición de neutralidade interna, as decisións ordinarias de xestión da organización do Partido, sen comprometer coa súa actuación a política ou o funcionamento máis alá do período do seu mandato.

2. Da constitución de Comisións Xestoras

a) A Constitución das Comisións Xestoras derivarase dos supostos previstos no apartado anterior pola remoción ou censura dos/as Secretarios/as Xerais e de aqueles outros supostos que se determinen regulamentariamente.

b) A súa constitución, nos supostos previstos estatutaria e regulamentariamente, deberá ser informada favorablemente pola Comisión de Ética correspondente e decidida pola Comisión Executiva de nivel superior, incluíndo ós seus compoñentes.

c) Durante o mandato das Comisións Xestoras, que non poderá prolongarse máis aló dos 90 días, o censo de afiliados, do nivel orgánico e territorial correspondente, non poderá modificarse, aos efectos do proceso de elección dos órganos aos que se substitúa temporalmente.

TÍTULO I. AFILIADOS E AFILIADAS

CAPÍTULO I. AFILIADOS E AFILIADAS

Artigo 7. Da afiliación

1. Poderán adquirir a condición de afiliados e afiliadas do Partido dos Socialistas de Galicia-PSOE (PSdeG-PSOE) os cidadáns e cidadás maiores de dezoito anos que manifesten a súa vontade de colaborar e participar nas actividades do Partido.
2. A condición de afiliado ou afiliada, ben como militante, como afiliado directo, ou como simpatizante adquirese por medio da inscrición no censo correspondente.
3. Aqueles galegos e galegas que residan fora de Galicia poderán, sen prexuízo da súa militancia nos partidos irmáns da Internacional Socialista, previa autorización da Comisión Executiva Federal, afiliarse ó PSdeG-PSOE.
4. A tramitación das solicitudes de admisión de afiliados en cada unha das modalidades de afiliación farase conforme ó correspondente Regulamento Federal.

Artigo 8. Do comportamento dos afiliados e afiliadas

Todos os afiliados e afiliadas coñecerán e respectarán o establecido no Código Ético do Partido, que, como anexo, forma parte integrante destes Estatutos. En tal sentido, o afiliado ou afiliada do Partido que incumpra o disposto nestes Estatutos, no Código Ético ou en calquera norma regulamentaria, que observe mala conducta cívica ou ética, falte ó programa ou aos acordos ou resolucións do Partido, exprese publicamente as súas opinións en termos irresponsables ou con deslealdade ó Partido ou ós seus afiliados e afiliadas, cometa actos de indisciplina, inxurie, calumnie a algunha persoa que pertenza ao Partido, ou de calquera outra forma viole as obrigas que a todos os membros do Partido impoñen os presentes estatutos, será sancionado/a, previos os trámites regulamentarios e mediante decisión dos órganos competentes, con medidas que, en aplicación do réxime disciplinario, poderán chegar ata a expulsión

Artigo 9.

Os afiliados e afiliadas do Partido non poden prestar o seu apoio ou participar en manifestacións, actos ou calquera outra iniciativa política promovida por outras organizacións expresamente prohibidas polos órganos do Partido ou cuxa convocatoria encerre contradición coas resolucións dos Comités e/ou Congresos do Partido.

A perda da condición de afiliado prodúcese cando concorran algunha das circunstancias previstas no artigo 8 dos Estatutos Federais.

CAPÍTULO II. MILITANTES

Artigo 10. Da militancia

1. Os e as militantes do Partido están adscritos/as a unha Agrupación Municipal ou de Distrito, a través da que exercen os seus dereitos e as súas obrigas, de acordo coa normativa do Partido
2. Son dereitos dos e das militantes, os seguintes:
 - a) O dereito a recibir da Organización a formación política ou técnica que mellor permita colaborar na loita polo socialismo e polo éxito da mesma nas tarefas que se lle encomenden.
 - b) O dereito a ser informado acerca da composición dos órganos directivos e de administración, a recibir, a través das canles orgánicas, información sobre as decisións adoptadas polos órganos do Partido nos distintos niveis e, en xeral, sobre todas aquelas cuestións que afecten á vida interna do Partido, á súa proxección externa e á súa actividade institucional.
 - c) O dereito a formar parte dos grupos socialistas que se formen ou existan e á libre expresión de ideas ou iniciativas no seu seo.
 - d) O dereito de discusión e crítica sobre posicións políticas propias e alleas mediante a libre expresión oral ou escrita e á súa libre comunicación dentro do Partido.
 - e) O dereito a realizar manifestacións públicas, xuízos de valor e expresión de opinións, de forma libre, leal e responsablemente cos límites do respecto á dignidade das persoas, así como ás resolucións e acordos democraticamente adoptados polos Órganos do Partido, no marco das súas competencias estatutarias.
 - f) O dereito ao sufraxio activo e á participación en todos os procesos electorais e orgánicos internos, nos termos que regulamentariamente se establezan para cada un deles.
 - g) O dereito a ser candidato ou candidata en cantos procesos electorais internos e externos existan, sen veto ou reparo algún que supoña discriminación ou vantaxe, salvo as limitacións que nestes Estatutos se sinalen en razón de antigüidade na militancia ou por incompatibilidades. Será condición necesaria para exercer este dereito estar ao corrente de cotización.
 - h) O dereito ao control político dos seus elixidos e responsables, baseado nunha información veraz, na libre expresión, o respecto ás persoas e a subxección ao lugar e tempo regulamentariamente establecidos.
 - i) O dereito á protección externa polo propio Partido, fronte aos ataques inxustos; e, interna, mediante a actuación imparcial e equitativa dos órganos competentes.
 - l) O dereito á utilización de medios materiais e humanos da Organización para o cumprimento das súas obrigas e o exercicio dos seus dereitos, coa correspondente autorización dos órganos executivos da instancia de que se trate.

m) O dereito a concursar, en cantas ocasións se produzan, para cubrir postos de traballo remunerados da Organización, que evitará a libre designación de persoas colaboradores, funcionarios/as ou empregados/as, salvo nos postos de estrita confianza. Igualmente terase dereito a ser elixido/a membro de tribunais cualificadores, ou de exame, no nivel correspondente, e a ser informado/a de as convocatorias que ao efecto se realicen.

n) O dereito a participar nunha organización sectorial e desenrolar a militancia 2.0 nos termos regulamentariamente establecidos.

ñ) O dereito de iniciativa política, que se configura como un dereito individual de exercicio colectivo, que se exercerá diante da respectiva Comisión Executiva ou ante os máximos órganos do Partido entre Congresos a nivel local (Asemblea local), provincial (Comité Provincial), comarcal, autonómico (Comité Nacional), e federal (Comité Federal), conforme as normas do Partido. As iniciativas que contén co apoio dun mínimo do 20% das sinaturas da militancia do ámbito territorial respectivo do órgano ó que se dirixa a iniciativa, serán de tratamento obrigado para este.

o) O dereito a impugnar os acordos adoptados polos órganos do Partido que se estimen contrarios á Lei ou aos presentes Estatutos, a través dos procedementos internos establecidos e, en todo caso, esgotados estes, ante os Xulgados e Tribunais competentes.

p) O dereito a acudir, en defensa dos seus dereitos como afiliado, ante a Comisión Federal de Ética e Garantías, ou ante calquera outro órgano do Partido ó que se lle atribúa a defensa dos seus dereitos.

o) Cando adquira a condición de militante terá dereito a recibir unha Guía de Acolida ao Militante e simpatizante.

3. Son deberes dos e das militantes, os seguintes:

a) O sentido da responsabilidade no traballo e en cantos ámbitos desenvolvan a súa actividade.

b) A defensa dos intereses xerais da Organización, a Declaración de Principios, Programa, Resolucións e Estatutos aprobados polos seus Congresos, así como os acordos lexitimamente emanados dos seus órganos de dirección, non podendo pertencer a outra organización política diferente.

c) A solidariedade material e moral co resto da militancia da Organización, o respecto ás súas opinións e posicións, ás súas persoas e á obrigada colaboración sen discriminación por razóns de distinta forma de concepción política.

d) Cumprir os Estatutos, o Código Ético, Regulamentos e demais normativa interna así como acatar as resolucións, directrices e instrucións que, no exercicio das súas competencias, diten os órganos do Partido.

e) Os afiliados e afiliadas do Partido deberán actuar nalgún movemento social. En caso de actuar sindicalmente, deberán de facelo, preferentemente, na Unión Xeral de Traballadores.

Na súa acción deberán aplicar e defender a estratexia do Partido, decidida, en cada caso, polos órganos competentes.

f) A realización de traballos políticos, sociais e sindicais concretos baixo o coñecemento da Comisión Executiva Municipal ou de Distrito e en colaboración cos compañeiros e compañeiras que na mesma tarefa constitúen equipo.

g) A achega dos seus coñecementos e colaboración a cantos órganos e institucións do Partido llo demanden.

h) A remisión, a través das canles orgánicas que se establezan, de tanta información posúan en relación coas tarefas de organización.

i) A asistencia activa a cantos actos da vida orgánica e política convoque a Organización.

l) A aceptación daqueles cometidos de representación política que democraticamente lle sexan requiridos ou executivamente designados, segundo os casos e salvo circunstancia ou causa xustificada.

m) Aquela persoa militante do Partido que traslade a súa residencia desde a área dunha Agrupación a outra, deberá solicitar o seu traslado a esta, e recoñeceráselle automaticamente se goza de todos os seus dereitos.

n) A colaboración económica a través do abono dunha cota mediante domiciliación bancaria.

ñ) Ser interventor/a ou apoderado/a nos diferentes procesos electorais.

o) A participación e colaboración na organización dos procesos de elección de candidatos e candidatas mediante o procedemento de eleccións primarias.

4. Os e as militantes que deban máis de seis meses de cotización perderán a súa condición de membros do Partido, pasando á condición de simpatizantes, previa notificación escrita da situación na que se atopan, ata que se produza o pago das cotas debidas, menos nos casos en que se xustifique que a falta de cotización é debida a unha situación de desemprego, ou calquera outra causa de forza maior, que lle impida facer fronte á mesma.

CAPÍTULO III Afiliación directa

Artigo 11.

1. Os afiliados/as directos/as adscritos ó PSdeG-PSOE son membros do Partido, sen integrarse como militantes en ningunha Agrupación Municipal ou de Distrito. Exercen os seus dereitos e obrigas no PSdeG-PSOE, de acordo coa normativa do Partido.
2. Os afiliados/as directos teñen iguais dereitos que os militantes do PSdeG-PSOE, establecidos no artigo 11 estes Estatutos. Por excepción, non poderán participar na elección das Secretarías Xerais e das Comisións Executivas de Distrito, Municipais e provinciais. Si poderán participar directamente en todos os procesos nacionais de

elección no PSdeG-PSOE. Así mesmo, tamén poderán exercer o seu dereito de iniciativa política a nivel orgánico no PSdeG-PSOE.

3. Os e as afiliados/as directos/as teñen iguais deberes, obrigas e responsabilidades que os militantes do PSdeG-PSOE establecidos no artigo 11 destes Estatutos.
4. Os e as afiliados/as directos/as que deban máis de seis meses de cotización perderán a súa condición de membros do Partido. Neste caso, poderán pasar á condición de simpatizantes, previa notificación escrita da situación na se atopan, ata que se produza o pago das cotas debidas, menos nos casos nos que se xustifique que a falta de cotización é debida a unha situación de desemprego, ou calquera outra causa de forza maior, que lle impida facer fronte á mesma.

Cando expresamente o solicite a persoa en cuestión poderá pasar a incorporarse ó censo de simpatizantes.

CAPÍTULO IV. Simpatizantes

Artigo 12.

1. Os e as simpatizantes do Partido son aquelas persoas dispostas a colaborar e participar nas actividades do Partido sen asumir as obrigas e deberes propios dos militantes e afiliados directos, senón as propias que se establecen neste artigo, asumindo un grao de implicación menor na organización do Partido.
2. Os e as simpatizantes teñen iguais dereitos que os recollidos para os militantes nestes Estatutos no artigo 10.2 a), b), e) e n) e os dereitos recoñecidos nas letras ñ), o) e p), exclusivamente naquelas cuestións que lles afecten na súa condición de simpatizantes. Ademais, recoñécelles o dereito a elixir nos procesos internos de elección de candidatos e candidatas nas distintas institucións representativas que se leven a cabo polo sistema de Primarias abertas, cumprindo os requisitos e conforme ao procedemento determinado Regulamentariamente.
3. Os e as simpatizantes teñen iguais deberes, obrigas e responsabilidades que os militantes do PSdeG-PSOE, establecidos no artigo 10.3 destes Estatutos, coa excepción dos establecidos nos seus apartados l), m), e o disposto na letra ñ) salvo no que respecta á súa participación nos procesos de Primarias Abertas como electores.
4. Perderase a condición de simpatizante polo desenvolvemento de calquera actividade contraria aos acordos, resolucións e actividades que adopte e leve a cabo o Partido, así como polo incumprimento dos deberes, obrigas ou responsabilidades establecidas nestes Estatutos.

TÍTULO II. ASOCIACIÓNS E COLECTIVOS

Artigo 13.

1. Coa finalidade de promover e favorecer as canles de comunicación e participación dos cidadáns cos órganos executivos, de decisión e control e de coordinación e, para facilitar que as suxestións e propostas dos cidadáns sexan incorporadas ao debate e resolucións do PSdeG-PSOE, o Partido propiciará en todo os niveis da Organización a participación en actividades e reunións de persoas, asociacións e colectivos en tarefas relacionadas coas materias propias da súa actuación e actividade na sociedade.
2. Os Órganos do Partido en Galicia, nos seus diferentes niveis, ademais das súas responsabilidades, competencias e obxectivos establecidos nas normas estatutarias e regulamentarias, deberán ser canles efectivas e fluídas de conexión cos cidadáns, dos que recollerán información, propostas e suxestións progresistas sobre temas de interese sectorial, que contribúan á elaboración dos programas políticos e electorais do Partido. Dende o PSdeG-PSOE potenciaranse as intervencións dos e das socialistas nos foros e faladoiros nos diferentes medios de comunicación.

Artigo 14.

Convenios de colaboración de asociacións e colectivos.

1. O PSdeG-PSOE, poderá establecer convenios de colaboración coas asociacións culturais, xuvenís, profesionais, estudantís, ecoloxistas, recreativas, cooperativas, centros de estudos, organizacións técnicas e clubs de opinión ou similares que desenvolvan o seu labor no seo dos movementos sociais, do movemento cidadán; do mundo da cultura, investigación e da universidade, sempre que nin nos seus estatutos nin nos seus fins existan contradicións cos principios ideolóxicos e resolucións dos Congresos do PSdeG-PSOE.
2. A colaboración política formalizarase mediante un convenio subscrito coa Comisión Executiva Nacional Galega, no que especificarán os deberes e os dereitos das organizacións colaboradoras.
3. Na primeira xuntanza que celebre o Comité Nacional Galego, deberase pronunciar sobre o convenio de colaboración, aprobándoo por maioría, e informando aos distintos órganos territoriais. En calquera caso, poderase recorrer ao órgano inmediatamente superior, que tamén deberá decidir por maioría.

TÍTULO III. ESTRUCTURA DO PSdeG-PSOE

CAPÍTULO I. ESTRUCTURA XERAL

Artigo 15.

O PSdeG-PSOE articúlase e estruturase sobre a base de Agrupacións Municipais, Agrupacións Comarcais e Agrupacións Provinciais.

Artigo 16.

Os Estatutos, Regulamentos e Resolucións que se adopten nos Congresos Provinciais, non poderán contradicir os Estatutos do Partido, nin os acordos, resolucións e directrices adoptados polo Congreso Nacional Galego, polo Comité Nacional, pola Comisión Executiva Nacional Galega e polos órganos Federais, e serán sometidos á ratificación do Comité Nacional Galego.

Artigo 17.

As Organizacións do Partido nos seus ámbitos poderán elaborar os seus propios regulamentos de funcionamento interno, que non poderán contradicir as normas estatutarias e regulamentarias de rango superior, e deberán ser ratificadas polo CNG e ser remitidas a tódalas Agrupacións Municipais.

Artigo 18.

1. Calquera actuación dos órganos que integran o Partido en Galicia, que sexa considerada contraria ao establecido nos Estatutos Federais ou Nacionais do Partido, aos acordos e resolucións da CENG ou do Comité Nacional Galego, poderá ser suspendida ou deixada sen efecto pola CENG, remitindo a resolución á primeira reunión que celebre o Comité Nacional Galego.
2. Cando a situación orgánica ou política dun determinado ámbito do Partido en Galicia o aconselle ou a actuación dun órgano dun determinado ámbito do Partido en Galicia resultase contraria ao establecido nestes Estatutos, ás resolucións emanadas do Congreso Nacional Galego, Comité Nacional ou da Comisión Executiva Nacional Galega, esta poderá adoptar as medidas que estime necesarias co fin de restaurar a normalidade, procedendo de acordo co establecido nos Estatutos e demais normas do Partido.

CAPÍTULO II. AGRUPACIÓNS MUNICIPAIS E DE DISTRITO

Artigo 19.

1. A Agrupación Municipal é a unidade básica de militancia do PSdeG-PSOE naqueles concellos nos que non exista Agrupación de Distrito. O seu ámbito de actuación será o

termo municipal, e ten autonomía para resolver os asuntos específicos que lle son propios, no marco das normas do Partido.

2. A Agrupación Municipal Estará formada por aqueles/as militantes que estando ao corrente das cotas, estean domiciliados ou desenvolvan a súa actividade no termo municipal. En todo caso, poderán optar entre a Agrupación que lle corresponda por residencia ou por lugar de traballo. Excepcionalmente, no ámbito dunha mesma Agrupación Provincial, os e as militantes poderán militar nunha Agrupación distinta á que lle corresponda, cando existan causas obxectivas que así o aconsellen. Estas situacións excepcionais, que deberán ser especificadas terán que ser aprobadas pola Comisión Nacional de Ética, de acordo coa CENG.
3. Os e as militantes que trasladen a súa residencia de unha Agrupación a outra, poderán solicitar o seu traslado na Agrupación onde milita. O traslado será automático, sempre e cando estea ao día na cotización ao Partido e non estea afectado por ningunha actuación disciplinaria.
4. Ningún militante poderá exercer cargos orgánicos ou representativos noutra Agrupación Municipal que non sexa a do seu lugar de militancia.

Artigo 20.

É responsabilidade da Agrupación Municipal impulsar na súa circunscrición a política global do Partido, executando as resolucións emanadas dos órganos superiores do mesmo. Así mesmo, serán responsables do cumprimento das obrigas dos militantes, de garantir a súa participación nas tarefas do Partido e de facer respectar os dereitos da militancia.

Artigo 21.

A constitución de novas Agrupacións Municipais corresponde á CENG, en coordinación coa CEP e a estrutura comarcal, para o que será preciso un número mínimo de 5 militantes.

Artigo 22.

En todas as Agrupacións Municipais existirá un Libro de Actas, un Libro de Contas e un Libro de Rexistro de Entradas e Saídas, dos que será responsable a Comisión Executiva Municipal e poderán ser fiscalizados pola CEP e pola CENG.

Artigo 23.

As Agrupacións Municipais terán asesoramento e defensa xurídica dentro das posibilidades e dispoñibilidades económicas do Partido e, sempre, coa previa autorización da CENG.

Artigo 24.

1. Os órganos da Agrupación Municipal son a Asemblea e a Comisión Executiva Municipal.

2. A Asemblea da Agrupación Municipal é o órgano máximo de decisión da Agrupación. Está composta por todos e todas as militantes que forman parte da mesma.
3. Son funcións propias da Asemblea Municipal:
 - a) Elixir a Comisión Executiva Municipal e, no seu caso, as vacantes que se produzan, a proposta do Secretario/a Xeral.
 - b) Elixir os/as Delegados/as ao Congreso Nacional Galego e Provincial, ao Comité Nacional Galego e ao Comité Provincial e, no caso de non existir suplentes, elixir as vacantes que se produzan.
 - c) Aplicar no seu ámbito as liñas de acción política xeral do Partido e dos Grupos Socialistas nas distintas Institucións, de acordo coas directrices marcadas polos órganos competentes.
 - d) Aprobar ou rexeitar a xestión da Comisión Executiva Municipal na derradeira Asemblea anual ordinaria, así como o seu plan de traballo.
 - e) Aprobar os presupostos ordinarios e extraordinarios da Agrupación Municipal.
 - f) Debater a xestión dos Órganos Nacionais e Provinciais para os Congresos Galego e Provincial, aprobándoa ou rexeitándoa, no seu caso.
 - g) Estudar o Relatorio Marco dos Congresos Galego e Provincial, aprobando ou, no seu caso, rexeitando as emendas presentadas, que poden ser á totalidade ou parciais, sendo, neste caso, de adición, substitución ou supresión.
 - h) Colaborar na elaboración e aprobación do programa electoral municipal.
 - i) Aprobar as propostas de lista de candidatos ás eleccións municipais.
 - l) Elaborar, se así o acorda, o proxecto de regulamento de funcionamento interno, que en última instancia terá que ser ratificado polo Comité Nacional Galego.
 - m) Facer as propostas que correspondan para cargos públicos e para os procesos electorais previstos na Normativa Reguladora dos Cargos Públicos.
 - n) Aprobar as actas das súas reunións.
 - ñ) Participar na estrutura comarcal do Partido.

Artigo 25.

A Asemblea Municipal reunirse en sesión ordinaria, polo menos, unha vez cada tres meses e, extraordinariamente, cando o estime conveniente a Comisión Executiva Municipal, ou cando o soliciten un terzo dos militantes da Agrupación, que farán constar na solicitude a Orde do Día da sesión.

Neste último caso a Asemblea terase que celebrar nun prazo máximo de 15 días a partir da entrada do escrito da solicitude na Comisión Executiva Municipal. No caso de que non se cumprira

cos prazos ou convocatoria, a CENG intervirá adoptando as medidas políticas e orgánicas que considere oportunas.

Artigo 26.

1. A Comisión Executiva Municipal é o órgano executivo da Agrupación Municipal que cumpre as resolucións da asemblea e aplica no ámbito municipal a política definida polos Congresos e Comités correspondentes, aplicando os acordos e políticas definidas polos órganos de nivel superior do Partido.
2. É elixida pola Asemblea Municipal e responde das súas actuacións diante dela en reunións ordinarias que se convocarán, para este fin, cada tres meses. Actuará colexiadamente, con independencia das responsabilidades de cada un dos seus membros.

Artigo 27.

A Comisión Executiva Municipal ten que ser un órgano operativo, para o que debe adecuar o seu tamaño e estrutura ás necesidades da actividade política no seu ámbito.

Artigo 28.

1. A Comisión Executiva Municipal comporase, como mínimo, de: Secretaría Xeral, Secretaría de Organización e Secretaría de Política Municipal.
2. Así mesmo, deberá contar coa Áreas de Acción Electoral, de Administración e de Formación, que poderán constituírse en Secretarías de Área independentes ou integrarse como Áreas adscritas á Secretaría de Organización.
3. Na creación e composición das Executivas Municipais, para unha mellor coordinación do traballo a realizar polo conxunto da Organización, teranse en conta as áreas existentes na CENG e na CEP.
4. Nas Agrupación nas que existan as Xuventudes Socialistas de Galicia, o/a seu Secretario/a Xeral participará nas reunións da Comisión Executiva Municipal, con voz e voto.

Artigo 29.

A Comisión Executiva Municipal celebrará as súas reunións coa periodicidade que ela mesma acorde e, polo menos, unha ao mes. Nas reunións ordinarias tratarase, ademais dos que se propoñan, os seguintes puntos:

1. Información sobre circulares, convocatorias e comunicados recibidos dos órganos superiores do Partido.
2. Altas e baixas.
3. Situación económica da Agrupación.

4. Actividade do Grupo Socialista no Concello.

Artigo 30.

Son funcións específicas da Comisión Executiva Municipal:

- a) Tramitar as altas e baixas de afiliados e simpatizantes e comunicalo ao órgano que corresponda.
- b) Administrar en nome dos órganos nacionais os bens do Partido a nivel municipal.
- c) Manter as relacións con outros grupos políticos e sindicais no seu ámbito.
- d) Organizar e dirixir as campañas electorais no seu ámbito, de acordo coa planificación xeral das mesmas.
- e) Coordinar a actividade do grupo municipal socialista, e dos cargos públicos adscritos á súa Agrupación Municipal.
- f) Convocar as Asembleas Ordinarias e Extraordinarias de acordo cos Estatutos e normas do Partido.
- g) Impulsar a creación da Agrupación Municipal das Xuventudes Socialistas de Galicia no seu termo municipal.
- h) Elaborar o programa anual de traballo, os presupostos e o informe de xestión, que serán presentados na última Asemblea do ano.
- i) Coordinar a relación cos simpatizantes, levando un rexistro dos mesmos e fomentando a súa incorporación ás actividades do Partido.

Artigo 31.

A dimisión do Secretario Xeral ou da metade máis un dos seus membros, implica a dimisión de toda a Comisión Executiva Municipal. Neste caso procederase conforme ó previsto nas normas do Partido.

Artigo 32.

De acordo cos Estatutos e Normas do Partido a CENG poderá crear Agrupacións de Distrito.

Artigo 33.

En todo o que respecta ás Agrupacións de Distrito e Agrupacións Municipais con Agrupacións de Distrito, estarase ao Establecido nos Estatutos Federais e nas normas e regulamentos que os desenrolan.

CAPÍTULO III. AGRUPACIÓNS COMARCAIS

Artigo 34.

O PSdeG recupera a súa tradicional estrutura comarcal; as bisbarras son as formas tradicionais de organización do territorio galego, situación recollida no Estatuto de Autonomía de Galicia. Esta estrutura permite ás agrupacións locais e grupos municipais manter plantexamentos conxuntos ou sinerxías positivas nas diferentes bisbarras. A CENG debe velar pola creación e funcionamento de dita estrutura.

En cada unha das comarcas establecidas na Disposición Final Primeira destes Estatutos constituirase unha Estrutura Comarcal, formada polas Agrupacións Municipais implantadas no seu ámbito territorial. A súa función será a de facilitar a coordinación entre a CENG e as Agrupacións Municipais para a realización, no seu ámbito, de actividades electorais políticas e institucionais, complementando así a tarefa das estruturas provinciais.

Artigo 35.

A CENG elaborará un regulamento de funcionamento das Agrupacións Comarcais que deberá ser aprobado no órgano nacional ou proceso que propoña dita Executiva. En calquera caso, deberá garantirse a presenza dos representantes das Agrupacións Locais implantadas no seu ámbito territorial e a participación real e efectiva da militancia, así como das XSG.

CAPÍTULO IV. AGRUPACIÓNS PROVINCIAIS

Artigo 36.

As Agrupacións Provinciais estarán constituídas polas Agrupacións Municipais e, no seu caso, de Distrito do seu ámbito.

Artigo 37.

A función das Agrupacións Provinciais é levar a cabo no seu ámbito a política xeral do Partido, adaptada ás especificidades da provincia e aos problemas dos seus habitantes, de acordo coa política definida para o conxunto de Galicia polo Congreso Nacional Galego, polo Comité Nacional e polas decisións que estime necesario adoptar a Comisión Executiva Nacional Galega, en concordancia cos Estatutos do Partido e coas normas e directrices emanadas dos órganos superiores do Partido.

Artigo 38.

Os órganos das Agrupacións Provinciais son: O Congreso Provincial, o Comité Provincial, a Comisión Executiva Provincial, A Comisión Provincial de Control Económico, a Comisión Provincial de Ética e a Comisión Provincial de Listas.

Artigo 39.

1. O Congreso Provincial é o máximo órgano político das Agrupacións Provinciais. Está formado polo delegados e delegadas elixidos para participar no mesmo, de acordo co previsto nos Estatutos e normas do Partido.
2. A súa preparación e desenvolvemento rexerase polos Estatutos e normas do Partido que resulten de aplicación e polo previsto no Regulamento Federal de Congresos.
3. O Comité Provincial establecerá o número de delegados e delegadas que asistirán ós Congresos Provinciais, fomentando a participación da militancia para que as Agrupacións Municipais, que cumpran os requisitos recollidos na normativa de aplicación, teñan, alomenos, un representante.

Artigo 40.

1. O Congreso Provincial reúne-se con carácter ordinario entre o terceiro e cuarto ano dende a celebración do Congreso Ordinario anterior, sempre, despois da celebración dos Congresos Federal e Nacional, dentro do prazo dos noventa días seguintes á celebración deste último, salvo circunstancias especiais que xustifiquen a modificación excepcional deste prazo.
2. As súas funcións son as seguintes:
 - a) Adoptar, atendendo ás especificidades e problemática da provincia, as resolucións necesarias para aplicar no seu ámbito territorial as políticas definidas para o conxunto de Galicia polo Congreso Nacional Galego, polo Comité Nacional e polas decisións adoptadas pola Comisión Executiva Nacional Galega, en concordancia cos Estatutos do Partido e coas normas e directrices emanadas dos órganos superiores do Partido.
 - b) Debater e xulgar a xestión da Comisión Executiva Provincial (CEP), do Comité Provincial e da Comisión Provincial de Control Económico.
 - c) Elixir a Comisión Executiva Provincial (CEP), os membros que correspondan do Comité Provincial, a Comisión Provincial de Control Económico e a Comisión Provincial de Ética.

Artigo 41.

Os Estatutos, Regulamentos e Resolucións que se adopten nos Congresos Provinciais, non poderán contradicir os Estatutos do Partido, nin os acordos, resolucións e directrices adoptados polo Congreso Nacional Galego, polo Comité Nacional, pola Comisión Executiva Nacional Galega e polos órganos Federais, e serán sometidos á ratificación do Comité Nacional Galego.

Artigo 42.

O Comité Provincial é, entre Congreso e Congreso, o máximo órgano de dirección política do Partido na Provincia. Está constituído por:

1. **Membros natos:**

- a) A Comisión Executiva Provincial
- b) Os/as membros da Comisión Provincial de Control Económico.
- c) Os/as membros da Comisión Provincial de Ética, con voz pero sen voto.
- d) Unha representación das XSG na provincia, acorde cos Estatutos do Partido.
- e) Os e as membros das Comisións Executivas Federal e Nacional que militen na provincia.
- f) Os/as deputados/as autonómicos socialistas, que militen na provincia.
- g) Os/as deputados/as e senadores/as socialistas, que militen na provincia.
- h) Os/as parlamentarios/as europeos/as que militen na provincia.
- i) O/a Presidente/a ou portavoz socialista na Deputación provincial.
- j) Un representante dos alcaldes e alcaldesas que militen na provincia e formen parte da Comisión Executiva da FEGAMP e, no seu caso, o Presidente deste organismo.
- k) O/a coordinador/a de cada grupo sectorial constituído a nivel Provincial.
- l) Os/as representantes dos colectivos provinciais asociados ao PSdeG-PSOE, segundo os compromisos recollidos no acordo ou convenio correspondente.
- m) Unha representación de Izquierda Socialista na provincia.

2. **Membros elixidos:**

- a) Os e as representantes elixidos de acordo co previsto no artigo 5.2 a) destes Estatutos tendo en conta o censo de militantes válido para a celebración do Congreso Provincial e o baremo establecido para a celebración do mesmo.
- b) Os e as membros elixidos no Congreso Provincial.

Artigo 43.

Son competencias do Comité Provincial:

- a) Adoptar as resolucións e os acordos necesarios, no marco do Congreso Provincial, para adaptar e aplicar no ámbito provincial, as políticas, acordos e decisións adoptadas polo Congreso Nacional, Comité Nacional e pola CENG, en concordancia coas políticas e Estatutos do Partido, e coas normas dos órganos superiores que os desenvolven.

- b) Aprobar o seu regulamento de funcionamento interno e o da CEP, así como as normas necesarias para o desenvolvemento e aplicación dos estatutos aprobados no Congreso Provincial.
 - c) Examinar e valorar a xestión da Comisión Executiva Provincial.
 - d) Iniciar o proceso de revogación ou censura do/a Secretario/a Xeral Provincial, que requirirá ser motivado e acordado, mediante votación secreta, por un mínimo do 51% de votos do Comité Provincial.
 - e) Esixir que as actuacións dos cargos públicos do Partido na provincia se adecúen aos modos de xestión socialistas.
 - f) Impulsar as políticas a realizar polos Grupos Socialistas na Deputación provincial e nos Concellos da provincia, facendo un seguimento do labor dos seus gobernos.
 - g) Cubrir as vacantes que se produzan na Comisión Executiva Provincial, Comisión Provincial de Ética e Comisión de Control Económico.
 - h) Aprobar, a proposta da Comisión Executiva Provincial, os orzamentos de funcionamento da estrutura provincial, así como a súa liquidación.
 - i) Solicitar, se o estima preciso, informes á Comisión Provincial de Control Económico, e coñecer o informe que esta elabore con ocasión do peche do exercicio orzamentario que corresponda.
 - l) Crear aquelas comisións de traballo que se estimen necesarias para o labor político a realizar no ámbito provincial. As propostas serán elevadas ao Pleno para sometelas a súa consideración e aprobación, se procede.
 - m) Aprobar, no seu caso, as conclusións de xornadas ou seminarios realizados dende a estrutura provincial. As conclusións aprobadas terán carácter vinculante.
 - n) Desempeñar as funcións que a Normativa Reguladora dos Cargos Públicos lle asigna na selección de candidatos e candidatas do Partido nos diferentes procesos electorais nos que estea prevista a súa participación.
 - ñ) Presentar e responder da súa xestión diante do Congreso Provincial.
 - o) Convocar os Congresos Provinciais do Partido, que estatutariamente lle corresponda.
 - p) Convocar, a proposta da CEP, as Conferencias políticas e sectoriais a celebrar.
- Elixir as persoas encargadas do Relatorio do Congreso Provincial e as encargadas de defender nel a xestión do Comité Provincial.
- q) Elixir os membros que o representan na Comisión Provincial de Listas e nomear esta na súa primeira reunión despois do Congreso Provincial.
 - r) Someter a aprobación as cotas extraordinarias e/ou complementarias que propoña a CEP.

- s) Elixir os/as 4 representantes do Comité Provincial na Comisión de Garantías Electorais Provinciais, a proposta da CEP.
- t) Fixar, no seu caso, as cotas provinciais de altos cargos e asimilados no ámbito provincial.
- u) Nomear dous membros do Comité Provincial para participar na Comisión que realiza o sorteo entre todos os Delegados e Delegadas, para nomear tres membros da Comisión de Credenciais dos Congresos Provinciais.
- v) Todas as demais competencias que lle veñan asignadas polos Estatutos Federais, Nacionais e Provinciais ou polas normas ditadas para o seu desenvolvemento e interpretación.

Artigo 44.

1. O Comité Provincial reunirase ordinariamente, polo menos, cada catro meses, sendo convocado pola Comisión Executiva Provincial, cunha antelación mínima de dez días.
2. Con carácter extraordinario, poderá ser convocado pola Comisión Executiva Provincial, coa urxencia que requira o caso, ou a solicitude de, polo menos, un terzo dos seus compoñentes. Neste último caso, a Comisión Executiva Provincial deberá convocar o Comité Provincial o antes posible e sempre antes de que transcorran dez días, contados a partires da data da solicitude, coa Orde do Día proposta polos/as solicitantes.
3. O Comité Provincial quedará validamente constituído, en primeira convocatoria, cando concorran máis da metade dos seus integrantes e, en segunda convocatoria, media hora máis tarde, cos/oas que estean presentes.
4. As decisións do Comité Provincial adoptaranse por maioría simple dos/as presentes, agás nos casos en que estatutariamente se esixa unha maioría cualificada. Nestes casos, para que as decisións sexan válidas, deberán concorrer á reunión, polo menos, os dous terzos dos/as integrantes do Comité Provincial.

Artigo 45.

As vacantes que se produzan entre os membros do Comité Provincial serán cubertas polos órganos que os elixisen, agás no caso dos membros escollidos polo Congreso Provincial, que se cubrirán polo Comité Provincial, a proposta da CEP.

Artigo 46.

O órgano executivo das Agrupacións Provinciais é a Comisión Executiva Provincial, que aplica e desenrola no ámbito da Provincia as resolucións dos Congresos Provincial, Nacional e Federal, as políticas definidas para o conxunto de Galicia polo Congreso Nacional Galego, polo Comité Nacional e pola Comisión Executiva Nacional Galega, en concordancia cos Estatutos do Partido e coas normas e directrices emanadas dos órganos superiores do Partido, levando a cabo as

iniciativas necesarias para facer fronte aos problemas da cidadanía, tendo en conta as especificidades da provincia.

Artigo 47.

Son funcións da Comisión Executiva Provincial:

- a) A organización, en coordinación coa CENG, do funcionamento da estrutura orgánica provincial do Partido no ámbito da Agrupación Provincial.
- b) A administración, conservación e defensa dos bens do Partido na provincia, de acordo co establecido nos Estatutos Federais e Nacionais do Partido e normas de desenrolo.
- c) A relación cos outros grupos políticos e sociais de ámbito provincial.
- d) A realización de cantas actividade sexan necesarias para o cumprimento dos obxectivos políticos do Partido na provincia.
- e) O seguimento do labor dos gobernos da Deputación provincial e dos concellos da provincia.
- f) Apoiar a acción política dos gobernos socialistas na provincia para o cumprimento dos Programas Electorais cos que concorre o Partido ás eleccións e para colaborar na súa explicación á cidadanía e á opinión pública.
- g) Constituír no seu seo comisións para asuntos específicos, podendo delegar facultades de decisión sobre os mesmos.
- h) Propoñer á CENG iniciativas e propostas, dende a perspectiva provincial, para a elaboración dos programas electorais.
- i) O apoio e seguimento das actuacións dos representantes do Partido nas institucións públicas provinciais, interpretando e valorando se as súas actuacións se axustan ao cumprimento dos obxectivos establecidos e aos modos de xestión socialista.
- l) Colaborar coa CENG e coas Agrupacións Comarcais na constitución das Agrupacións Municipais e vertebrar a estrutura orgánica do Partido na provincia.
- m) Coordinar, de acordo coa CENG, as tarefas políticas na provincia, definindo proxectos, prioridades e avaliando a consecución de obxectivos.
- n) Nomear e constituír un Comité Electoral Provincial nas distintas convocatorias electorais.
- ñ) Executar e responsabilizarse do cumprimento dos acordos adoptados polo Congreso provincial, o Comité Provincial e os órganos superiores do Partido.
- o) Acordar, en coordinación coa CENG, e propoñer ao Comité Provincial a realización das conferencias políticas e sectoriais provinciais que se estimen necesarias para a acción política do Partido na provincia.

- p) Elaborar e presentar, no primeiro trimestre de cada exercicio, os presupostos provinciais do Partido ó Comité Provincial, e a súa liquidación no final de ano.
- q) Elaborar e aprobar o seu regulamento de funcionamento.
- r) Levar a cabo as actuacións que, en aplicación da Normativa reguladora dos Cargos Públicos, lle correspondan en relación coa selección de candidatos e candidatas do Partido nos diversos procesos electorais.
- s) Propoñer os nomes dos/as membros da Comisión de Garantías Electorais Provinciais para a súa aprobación polo Comité Provincial.
- t) Propoñer, de acordo coa CENG, cotas extraordinarias e/ou complementarias para a súa aprobación polo Comité Provincial.
- u) Contribuír á resolución dos conflitos internos que xurdan no ámbito provincial.
- v) Impulsar a creación, funcionamento e coordinación das Organizacións Sectoriais Provinciais.
- x) Realizar as campañas electorais no ámbito provincial, de acordo coas directrices e decisións dos órganos Federais e Nacionais do Partido.
- z) Instruír, no seu caso, os expedientes disciplinarios nos que sexa competente de acordo cos Estatutos e normas do Partido.
- aa) Acordar as convocatorias e a Orde do Día das reunións do Comité Provincial.
- bb) Propoñer ao Comité Provincial a convocatoria do Congreso Provincial Ordinario e, no seu caso, convocar o Congreso Provincial Extraordinario.
- cc) Realizar calquera outra función prevista nos Estatutos aprobados no Congreso Provincial e nos Estatutos, normas e resolucións do órganos superiores de dirección do Partido.

Artigo 48.

1. A Comisión Executiva Provincial reunirase coa frecuencia que ela mesma acorde. Será convocada polo Secretario/a Xeral ou a petición, por escrito, dun terzo dos seus membros. As súas decisións adóptanse por maioría simple dos membros presentes. Para que estas teñan validez requírese que todos os membros foran notificados da reunión e o quórum da maioría simple.
2. Funcionará en Pleno ou Permanente, en función do establecido no seu Regulamento de funcionamento, que deberá ser aprobado polo Comité Provincial e ratificado polo Comité Nacional Galego.
3. A Comisión Executiva Provincial poderá constituír no seu seo comisións para asuntos específicos nos que delegue a facultade de decidir sobre os mesmos. A tales efectos aprobará as normas que estime convenientes.

Artigo 49.

1. A Comisión Executiva Provincial estará composta polos cargos e persoas que integren a candidatura que resulte elixida polo Congreso Provincial.
2. Co fin de facilitar o funcionamento coordinado coa CENG e conseguir a maior eficacia posible nas políticas e actividade a realizar polo Partido no conxunto de Galicia, procurarase que a composición das Comisións Executivas elixidas polos Congresos Provinciais se adapte ó organigrama adoptado polo Congreso Nacional para a Comisión Executiva Nacional Galega.
3. Tamén formarán parte da Comisión Executiva Provincial, con voz e voto:
 - a) O/a Presidente da Deputación Provincial, se ostenta o cargo un ou unha socialista. De non ser así a representación corresponderíalle o ou a Portavoz Socialista do Grupo Provincial.
 - b) Un representante nomeado por Xuventudes Socialistas de Galicia.
 - c) Un representante de cada agrupación comarcal elixido pola militancia.

Artigo 50.

Calquera actuación dos órganos do ámbito provincial, que sexa considerada contraria ó establecido nos Estatutos Federais ou Nacionais do Partido, aos acordos e resolucións da CENG ou do Comité Nacional Galego, poderá ser suspendida ou deixada sen efecto pola CENG, remitindo a resolución á primeira reunión que celebre o Comité Nacional Galego.

Artigo 51.

Os convenios con asociacións e colectivos que, no seu caso, se realicen no ámbito provincial deberán formalizarse ó amparo do establecido pola CENG.

Artigo 52.

A CENG establecerá os mecanismos necesarios para garantir a organización e funcionamento coordinado coas estruturas provinciais e comarcais do Partido, así como para planificar a realización de actos e actividades políticas. A CENG exerce a coordinación política e organizativa no conxunto do territorio galego, contando coa cooperación dos órganos provinciais, comarcais e locais para o desenvolvemento das políticas territoriais e organizativas, así como sobre os cargos institucionais do partido.

CAPÍTULO V. ORGANIZACIÓNS SECTORIAIS

Artigo 53.

As Organizacións Sectoriais son estruturas de participación dos afiliados e afiliadas socialistas de Galicia en tarefas de información, debate e propostas relacionadas coas materias propias do seu

ámbito de actuación. Poderán elevar análises e propostas aos órganos Nacionais de dirección do Partido, contribuíndo tamén con súas achegas á elaboración dos programas políticos e electorais.

Artigo 54.

O seu obxectivo é facilitar e fomentar a participación de todos os afiliados e afiliadas no traballo sectorial do Partido, coa máxima interlocución directa coa sociedade, especialmente cos colectivos sociais do seu ámbito.

Artigo 55.

As Organizacións Sectoriais crearanse nos ámbitos Nacional ou Provincial. A participación directa dos afiliados e afiliadas producirase no ámbito Provincial, mentres que as de ámbito Nacional terán un carácter de coordinación, asesoramento e apoio das provinciais.

Artigo 56.

As Organizacións Sectoriais son as seguintes:

- a) Organización Sectorial de Educación.
- b) Organización Sectorial de Medio Ambiente.
- c) Organización Sectorial de Participación Cidadán e diversidade.
- d) Organización Sectorial de Sanidade.
- e) Organización Sectorial da Sociedade da Información.
- f) Organización Sectorial de Emprendedores, Economía Social e Traballadores Autónomos.
- g) Organización Sectorial de Innovación Turística.
- h) Organización Sectorial de Territorio, infraestruturas e mobilidade

Artigo 57.

Poderanse constituír Organizacións Sectoriais nos ámbitos de Nacionalidade e Provincial, cando acaden o 2% do total do censo de afiliación dos seus respectivos ámbitos territoriais.

Artigo 58.

1. As Organizacións Sectoriais estarán abertas á participación de todos os afiliados e afiliadas que expresen por escrito a súa vontade de participar nas súas actividades. Esta vontade non poderá ser condicionada con ningún tipo de requisito, sexa profesional ou doutro tipo que impida a participación efectiva.
2. A participación a efectos plenos referirase a unha soa Organización Sectorial, esta adscrición poderá modificarse por vontade expresa do interesado.

3. As Organizacións Sectoriais deberán propiciar a maior participación nas actividades e reunións de persoas non afiliadas ao Partido. Deberán comprometerse a ser canles efectivas de conexión cos/as cidadáns/as, de quen recollerán as súas propostas e suxestións sobre os temas de interese sectorial.
4. As Organizacións Sectoriais impulsarán a realización de actividades temáticas, a constitución de grupos de traballo e a coordinación con organizacións e colectivos.
5. As Organizacións Sectoriais poderán instar á participación activa nalgunha organización ou colectivo social de carácter e valores progresistas, constituídos autonomamente e que se ocupen da área de interese daquela Organización Sectorial na que o/a afiliado/a se integre.

Artigo 59.

1. A estrutura das Organizacións Sectoriais estará integrada polo Plenario, O Comité Coordinador e o/a coordinador/a.
2. O Órgano soberano será o Plenario, que estará composto no ámbito provincial por todos os afiliados e afiliadas inscritos, e no de ámbito de nacionalidade polos membros elixidos nos plenarios provinciais.
3. Cada plenario sectorial elixirá, de acordo co procedemento establecido, o seu comité coordinador, o/a coordinador/a, que será o/a portavoz en e diante dos órganos executivos e deliberantes do Partido.

Artigo 60.

As Organizacións Sectoriais celebrarán conferencias periódicas, nas que debaterán textos, comunicacións e proposicións que, no seu caso, elevarán ás instancias executivas ou deliberantes no seu ámbito territorial. Terán recoñecida a súa participación, con voz e voto, nos Comités e Congresos do seu ámbito, conforme ó establecido nas normas do Partido. Os seus delegados e delegadas poderán participar na elección e control dos órganos executivos e de representación do Partido. Serán elixidos a través do procedemento previsto para a elección de delegados/as a Congresos e Conferencia, pero aqueles que formen parte do seu censo para a elección dos seus delegados/as, deberán optar pola elección dos delegados/as sectoriais, non podendo participar na elección dos delegados e delegadas correspondentes por territorio.

Artigo 61.

As Organizacións Sectoriais, en todas as cuestións referidas á situación de afiliación dos seus membros e aos procesos orgánicos dependerán das Secretarías de Organización e manterán unha relación funcional coas secretarías ás que lle competan os temas sectoriais ou temáticos que lle son propios.

Artigo 62.

As Organizacións Sectoriais, rexeranse polos Estatutos do Partido, polas Normas e Regulamentos que lle resulten de aplicación e polos seus Regulamento Internos.

TÍTULO IV. ÓRGANOS NACIONAIS DO PSdeG-PSOE

Artigo 63.

Os órganos do Partido a nivel nacional son: O Congreso Nacional Galego (CN), o Comité Nacional Galego (CNG), a Comisión Executiva Nacional Galega (CENG), a Comisión Nacional de Listas, a Comisión Nacional de Ética, e a Comisión de Control Económico.

CAPÍTULO I. CONGRESO NACIONAL GALEGO

Artigo 64.

1. O Congreso Nacional é o órgano supremo e soberano do PSdeG-PSOE. Está integrado polos delegados e delegadas elixidos nas Agrupacións Municipais. Os membros da Comisión Executiva Galega non poderán ser delegados ou delegadas polo seu ámbito. O seu desenrolo axustarase ao establecido no Regulamento Federal de Congresos e aos presentes Estatutos.
2. O Congreso Nacional será convocado polo Comité Nacional, quen determinará as datas e lugar de reunión, polo menos con 60 días de antelación. Enviárase a tódalas Agrupacións unha proposta de Orde do Día Provisional e un Relatorio-Marco elaborados polo Comité Nacional, xunto coas Memorias de Xestión do Comité Nacional, Comisión Executiva Nacional, Comisión Nacional de Ética, e Comisión de Control Económico.
3. As Agrupacións municipais dispoñerán dun máximo de 30 días para formular suxestións ao Orde do Día, presentar proposicións, emendas parciais ou relatorios alternativos sobre materias de calquera natureza, tanto se figuran incluídas no Relatorio-Marco como se non, sempre que teñan un mínimo do 20 por 100 de apoio na respectiva asemblea.
4. Quince días antes da data fixada para a celebración do Congreso, o Comité Nacional, a través da Comisión Executiva Nacional Galega, enviará a tódalas agrupacións municipais e delegados/as elixidos para o Congreso Nacional, unha Memoria con tódalas emendas e proposicións recibidas
5. O número de delegados e delegadas poderá oscilar entre 500 e 1000 e será establecido polo CNG en función do censo de militantes válido para a celebración do Congreso que corresponda.
6. Unha vez convocado o Congreso polo CNG, os/as militantes que se dean de alta no Partido non terán dereito a ser nin electores nin elixibles no proceso de elección dos delegados/as ao Congreso.

Artigo 65.

1. As Agrupacións Municipais elixirán os seus Delegados e Delegadas ao Congreso Nacional nunha sesión Extraordinaria convocada ao efecto.
2. Asistirá unha representación, con voz pero sen voto, das correntes de opinión e dos colectivos que estiveran asociados ao PSdeG-PSOE ou manteñan un protocolo de colaboración, cun número de delegados/as que será determinado polo Comité Nacional. Todo elo sen prexuízo dos posibles dereitos a participar con voto dos colectivos ou asociacións coas que se acordara no documento de asociación.
3. Asistirá unha representación con voz e voto das Organizacións Sectoriais constituídas no ámbito nacional, cun número de delegados/as que lle corresponda en función do da Normativa do Partido a aplicar.
4. Participará unha delegación das XSG, con voz e voto, cun número de delegados e delegadas que se determinará en base ao seu censo de afiliación regularizado segundo o procedemento establecido para o censo do Partido, baixo a supervisión da Secretaría de Organización do PSOE, e ao baremo aplicado polo Partido. Ó respecto, a Secretaría de Organización do PSOE e de JSE emitirán o oportuno certificado. En todo caso, a representación das XSG será, como mínimo, do 2% e como máximo do 5% dos representantes no Congreso.
5. Para un maior enriquecemento do debate e das resolucións de políticas sectoriais, poden participar nos debates de Comisións ou Pleno, con voz e sen voto, aportando análises e propostas os representantes de movementos asociativos e de colectivos progresistas que a CENG ou o CNG consideren de interese para o mellor desenvolvemento dos obxectivos do Partido.
6. Os membros do CNG poderán participar no Congreso Nacional con voz pero sen voto.

Artigo 66.

O Congreso reúnese ordinariamente entre o terceiro e o cuarto ano dende a celebración do Congreso anterior, salvo que circunstancias especiais de interese político ou orgánico aconsellen a modificación desta previsión temporal e, extraordinariamente, cando o convoque o CNG, a CENG ou a metade máis un dos militantes.

1. O Congreso Nacional define os principios e fixa os programas do Partido, establece a liña política do mesmo e sinala a súa estratexia, adaptando as Resolucións de nivel Federal á peculiaridade da nacionalidade galega.
2. O Congreso Nacional debate e xulga a xestión da Comisión Executiva Nacional Galega, do Comité Nacional, da Comisión Nacional de Ética e da Comisión de Control Económico.
3. O Congreso Nacional elixe a Comisión Executiva Nacional Galega, 45 membros do Comité Nacional, a Comisión Nacional de Ética, a Comisión de Control Económico e aos membros do Comité Federal que correspondan.

4. Adopta resolucións e resolve sobre calquera outra materia, sempre que non entre en contradicións cos Estatutos e Resolucións Federais.

Artigo 67.

A elección da Mesa, Comisión Electoral, e a votación das resolucións, ditames e acordos, realizarase mediante voto individual e público dos/as delegados/as.

A votación da xestión da CENG, CNG, Comisión Nacional de Ética e Comisión de Control Económico realizarase mediante o voto individual e público dos/as delegados/as.

1. A CENG será elixida de acordo co previsto no artigo 5.1 b) dos presentes Estatutos:
 - a) A elección do/a Secretario/a Xeral, de acordo co establecido no artigo 5.1 b), mediante o sistema de primarias, por voto individual, directo e segredo dos e das militantes do PSdeG-PSOE e, no seu caso, dos afiliados e afiliadas directas, que teñan plenos dereitos políticos conforme ó regulado nas normas do Partido.
 - b) A elección do resto de membros que integran a CENG realízase mediante sistema maioritario, por voto individual, directo e secreto dos delegados, previa presentación, polo/a Secretario/a Xeral electo/a, á Comisión Electoral da correspondente lista.
2. A elección das Comisións Nacional de Ética e de Control Económico realizarase mediante sistema de voto maioritario en votación individual e secreta dos delegados e delegadas, previa presentación das candidaturas á Comisión Electoral, en listas completas, pechadas e bloqueadas.
3. A elección polo Congreso, dos 45 membros do CNG, e dos membros do Comité Federal, realizarase mediante votación individual e secreta dos/as delegados/as, previa presentación das candidaturas á Comisión Electoral en listas completas, pechadas e bloqueadas.
4. Todos os delegados e delegadas teñen voz e voto no debate do Relatorio. Calquera emenda que conte, alomenos, co 20% dos seus votos, poderá ser defendida no plenario.

Artigo 68.

1. O Congreso Nacional será convocado polo CNG, que determinará as datas e o lugar de celebración, con 60 días de antelación como mínimo. Enviarase a todas as Agrupacións Municipais unha proposta da Orde do Día provisional, xunto coa Memoria de Xestión do CNG, Comisión Nacional de Ética, CENG e o Relatorio Marco elaborado pola CENG e aprobada no CNG.
2. As Agrupacións Municipais poderán formular suxestións á Orde do Día, presentar proposicións, emendas parciais e textos alternativos sobre materias de calquera natureza, tanto se figuran no Relatorio Marco como se non, sempre que obteñan un mínimo do 20% de apoio.

3. O CNG, a través da CENG, enviará, coa antelación fixada polo propio Comité para a celebración do Congreso, ás Agrupacións Municipais e aos delegados e delegadas elixidos para o Congreso, unha memoria con todas as emendas e proposicións recibidas. As Agrupacións deberán notificalo á militancia.
4. Tanto as Resolucións do Congreso Nacional, coma o resultado das Conferencias sobre Política Sectorial, serán editadas pola Dirección do Partido, que se responsabilizará do seu envío aos órganos das distintas estruturas do Partido.

Artigo 69.

1. Cando circunstancias especiais aconsellen a convocatoria dun Congreso Nacional Extraordinario ou cando proceda convocalo para tratar sobre algún tema específico, non será preciso atendelos prazos establecidos no artigo anterior, aínda que, en todo caso, haberá que convocarse con un mínimo de 40 días de antelación.
2. O Congreso Nacional Extraordinario poderá ser convocado polo Comité Nacional ou pola Comisión Executiva Nacional Galega e, preceptivamente, cando o pidan a metade máis un dos militantes. O órgano convocante determinará a data e lugar da xuntanza, así como os puntos da Orde do Día.
3. O Congreso Nacional Extraordinario soamente pode adoptar resolucións sobre as materias previstas na Orde do Día da convocatoria.

CAPÍTULO II. COMITÉ NACIONAL GALEGO

Artigo 70.

1. O Comité Nacional Galego é o órgano máximo de dirección política entre Congresos. Está constituído por:

Membros natos:

- a) A Comisión Executiva Nacional Galega.
- b) Os/As representantes do PSdeG-PSOE no Comité Federal.
- c) Os/as membros da Comisión Nacional de Ética, con voz peros sen voto.
- d) Os/as membros da Comisión de Control Económico.
- e) O/A Presidente/a da Xunta de Galicia, cando o PSdeG-PSOE asuma a responsabilidade do Goberno e sexa militante.
- f) Unha representación das XSG, acorde co previsto nos Estatutos do Partido.
- g) O/a Presidente/a do Grupo Parlamentario Socialista de Galicia.
- h) Os/as deputados/as autonómicos/as socialistas.
- i) Os/as deputados/as senadores/as socialistas.

- l) Os/as parlamentarios/as europeos/as do PSdeG-PSOE
- m) Os/as Presidentes/as ou portavoces socialistas nas Deputacións provinciais.
- n) O/a Presidente/a da FEGAMP, sempre que sexa militante, e no seu defecto, aquel membro do PSdeG-PSOE que ostente o cargo de maior relevancia na Comisión Executiva deste organismo.
- ñ) O coordinador/a de cada grupo sectorial constituído a nivel Nacional.
- o) Os/as representantes dos colectivos asociados ao PSdeG-PSOE, segundo o convenio asinado, sempre que nos convenios no se especifique o contrario.
- p) Os/as ex Secretarios/as Xerais e Presidentes/as autonómicos do PSdeG-PSOE.
- q) Unha representación de Izquierda Socialista en Galicia.

Membros elixidos:

- a) Os/as 45 membros elixidos no Congreso Nacional.
- b) Os delegados e delegadas elixidos nas Asembleas Municipais e, no seu caso, intermunicipais, a determinar en función do número de militantes. A elección destes membros efectuarase tendo en conta o censo de militantes válido para a celebración do Congreso Nacional e o baremo fixado pola CENG.
- 2. Cada membro do Comité Nacional poderá ser revocado en todo momento, por causas xustificadas, pola instancia que o elixiu, garantindo o respecto das minorías, se fora o caso.
- 3. Os membros do Comité Nacional están obrigados a informar, regularmente, aos órganos que os elixiron, dos debates e resolucións adoptados polo mesmo.
- 4. As ausencias reiteradas, así como as inxustificadas dos delegados/as membros do CNG serán comunicadas ás Agrupacións Municipais respectivas para que estas procedan, segundo entendan conveniente, á súa substitución.

Artigo 71.

Son competencias do Comité Nacional Galego (CNG):

- a) Convocar o Congreso do Partido.
- b) Elixir os membros do CNG que formarán conxuntamente cos membros da CENG, nomeados ao efecto, a Comisión de Redacción do Relatorio Marco do Congreso Galego.
- c) Definir a política do Partido entre Congreso e Congreso, sempre en consonancia coas Resolucións do Congreso anterior.
- d) Iniciar o proceso de revogación ou censura do/a Secretario/a Xeral do PSdeG-PSOE, que requirirá ser motivado e acordado, mediante votación secreta, por un mínimo do 51% dos votos do Comité Nacional.

- e) Elaborar e aprobar o programa electoral de Galicia.
- f) Realizar o seguimento do labor político do Goberno Galego e do seu desenvolvemento lexislativo e normativo.
- g) Garantir que os modos de xestión dos cargos públicos se adecúen aos modos de xestión socialista.
- h) Aprobar o regulamento de funcionamento interno do propio CNG.
- i) Aprobar os regulamentos internos dos diversos órganos de todos os niveis organizativos.
- l) Recabar información dos representantes do Partido no Comité Federal.
- m) Aprobar os presupostos ordinarios e extraordinarios do Partido a proposta da CENG e ser informado das variacións patrimoniais que se teñan producido.
- n) Cubrir as vacantes que se produzan na CENG, na Comisión Nacional de Ética e na Comisión de Control Económico.
- ñ) Dar conta da súa xestión ao Congreso, para o que elixirá unha Comisión de tres dos membros electos.
- o) Elección de dous membros do CNG para formar parte da Comisión de Selección de 3 Delegados para a Comisión de Credenciais.
- p) Cubrir as vacantes do PSdeG-PSOE no Comité Federal que puideran producirse.
- q) Aprobar, no seu caso, as conclusións das xornadas ou seminarios que se convoquen para desenrolar a liña política do Partido. As conclusións aprobadas terán carácter vinculante.
- r) Determinar a política de alianzas do Partido e dirimir as discrepancias entre as Agrupacións nesta materia.
- s) Aprobar o Regulamento do Congreso Nacional Galego. Aprobar, a proposta da CENG, os Regulamentos dos distintos órganos territoriais.
- t) Ratificar o/a candidato/a á Presidencia da Xunta de Galicia.
- u) Ratificar as listas electorais que lle sexan presentadas pola CENG, previo ditame da Comisión Nacional de Listas
- v) Elixir, na súa primeira reunión despois do Congreso, os membros da Comisión Nacional de Listas que lle corresponden.
- x) Fixar as cotas especiais de altos cargos e asimilados, así como as cotas extraordinarias e revisar anualmente as cotas mínimas por militante.
- z) Nomear a Comisión Xestora que resulte da aplicación do procedemento previsto no artigo 6.1 a) dos presentes Estatutos.

Artigo 72.

1. O Comité Nacional Galego reúne-se sendo convocado pola CENG, polo menos, tres veces ao ano, dúas delas en sesión ordinaria convocadas cunha distancia de, polo menos, seis meses. No derradeiro CNG de cada ano, a CENG, renderá conta da xestión realizada ao longo do mesmo.
2. O Comité Nacional pode ser convocado con carácter extraordinario, cando o xulgue conveniente a CENG ou o soliciten alomenos un terzo dos/as seus/súas compoñentes.
3. As sesións ordinarias deberan ser convocadas, polo menos, con 7 días de antelación.
4. As sesións extraordinarias serán convocadas coa urxencia que requira o caso, e os acordos recaídos serán válidos, sempre que foran convocados por escrito todos/as os/as seus membros e os acordos se adopten pola maioría simple dos presentes.
5. Cando se produzan vacantes entre os membros do CNG, procederase a unha nova elección polas instancias correspondentes, salvo no caso dos 45 membros elixidos polo Congreso Nacional, que se cubrirán polo Comité Nacional a proposta da CENG.

CAPÍTULO III. COMISIÓN EXECUTIVA NACIONAL GALEGA

Artigo 73.

A Comisión Executiva Nacional Galega realiza no ámbito de Galicia a política definida polos órganos de dirección do Partido, o Congreso Nacional e o Comité Nacional Galego, adoptando con este fin cantas decisións estime necesarias, sempre de acordo coas normas e directrices emanadas daqueles.

A CENG aplica permanentemente a política do PSdeG-PSOE.

Artigo 74.

Son funcións específicas da CENG:

- a) A Organización da vida interna do Partido.
- b) As relacións con outros grupos políticos galegos e os militantes socialistas galegos na emigración.
- c) Facer un seguimento do censo de afiliados e simpatizantes do Partido facilitado polo DFAC.
- d) A administración dos bens do Partido.
- e) A realización de cantas actividades sexan necesarias en todos os eidos para o Cumprimento dos fins do Partido.
- f) Realizar o seguimento político do labor do Goberno Galego e o desenvolvemento lexislativo no seu ámbito.

- g) Garantir en última instancia o seguimento da actuación dos representantes do Partido nas institucións públicas, interpretando e valorando se a súa actuación se axusta ao cumprimento dos obxectivos fixados.
- h) Establecer as fórmulas máis axeitadas para asegurar, en todo momento, a coordinación das liñas de acción política realizadas dende as distintas esferas onde actúan os socialistas, analizando e definindo previamente as prioridades políticas marcadas polos socialistas.
- i) Organizar e dirixir as campañas electorais a nivel galego de acordo coas directrices marcadas polo Comité Nacional Galego, e coordinar e adaptar á realidade galega as campañas para as eleccións lexislativas do Estado, de acordo coa planificación xeral das mesmas.
- l) Organizar e promover a formación dos/as militantes.
- m) Promover a edición das publicacións periódicas oficiais do Partido.
- n) O apoio ao desenvolvemento da acción política dos/as socialistas no goberno e a colaboración na súa explicación á opinión pública.
- ñ) Presentar os presupostos do Partido ao CNG nos tres primeiros meses de cada exercicio.
- o) Propoñer ao Comité Nacional o/a candidato/a á Presidente/a da Xunta.
- p) Propoñer ao Grupo Parlamentario os/as compañeiros/as que formarán parte da Mesa do Parlamento, así como o Portavoz e os/as compañeiros/as que formarán parte da dirección do Grupo Parlamentario.
- q) Convocar xunto coas Organizacións Sectoriais as conferencias sectoriais que crea conveniente e seguir a través das diversas secretarías a actividade sectorial do Partido.
- r) Asumir cantas funcións lle correspondan polos Estatutos do Partido e a normativa que os desenrolan.

Artigo 75.

1. A CENG xuntarase coa frecuencia que por si mesma acorde. Normalmente será convocada polo Secretario Xeral, podendo delegar na Secretaría de Organización, ou por solicitude escrita dun terzo dos seus membros.
2. A CENG funcionará en Pleno ou Permanente, en función do que sinala o seu Regulamento de funcionamento interno, que se aprobará no primeiro mandato da CENG.

Artigo 76.

1. A Comisión Executiva Nacional Galega é elixida directamente pola maioría simple dos votos representados no Congreso. A súa composición será a seguinte:

- Presidencia
- Secretaría Xeral
- Vicesecretaría Xeral Política e Portavoz
- Vicesecretaría Xeral de Sustentabilidade
- Vicesecretaría Xeral de Igualdade
- Secretaría de Área de Organización
- Secretaría de Acción Electoral e Coordinación
- Secretaría da Militancia
- Secretaría de Política Institucional
- Secretaría de Área de Política Municipal
- Secretaría Executiva de Política Municipal (C)
- Secretaría Executiva de Política Municipal (LU)
- Secretaría Executiva de Política Municipal (OU)
- Secretaría Executiva de Política Municipal (PO)
- Secretaría de Economía
- Secretaría de Políticas Sociais
- Secretaría de Xustiza
- Secretaría de Activismo e Movementos Sociais
- Secretaría de Estudos e Programas
- Secretaría de Formación
- Secretaría de Dereitos e Liberdades
- Secretaría de Ordenación Territorial
- Secretaría de Cultura
- Secretaría de Emigración
- Secretaría de Pesca
- Secretaría de Comercio
- Secretaría de Sanidade
- Secretaría de Educación
- Secretaría de Medio Rural
- Secretaría de Área

19 Secretarías Executivas

2. Participarán nas reunións da CENG:
 - Os catro Secretarios/as Xerais provinciais.
 - O/A Presidente/a ou Portavoz do Grupo Parlamentario socialista.
 - O/A Secretario/a Xeral das XSG, nos termos establecidos no artigo 130.1 destes Estatutos.

- Un/ha Ministro/a en representación dos/as Ministros/as galegos/as, cando o PSOE governe no Estado.
- O/A Presidente/a ou vicepresidente/a, no seu caso, da FEGAMP.
- Os/as Presidentes/as das Deputacións provinciais.
- 3. Os/As Deputados/as e Senadores/as asistirán ás reunións da CENG, sempre que lles sexa requirida a súa presenza.

Artigo 77.

1. O/A Secretario/a Xeral coordina a política e a estratexia do Partido. É o portavoz cualificado da CENG. Ostenta a representación do Partido e coordina os traballos da CENG. Así mesmo, autoriza coa súa sinatura todos os documentos políticos, orgánicos e administrativos do PSdeG-PSOE.
2. No caso de que o Secretario/a Xeral asuma funcións no Goberno da Xunta poderá delegar nun membro da CENG as seguintes funcións:
 - a) A coordinación efectiva do traballo interno e externo do Partido a nivel executivo, potenciando o mesmo mediante unha dedicación específica ás tarefas do Partido.
 - b) Ser o enlace permanente entre o Partido e os compañeiros e compañeiras que estean ao fronte das distintas administracións ou gobernos, trasladándolles a estes os criterios e consideracións do Partido.
 - c) Ser o portavoz cualificado da CENG e o encargado de emitir as opinións oficiais do Partido.

Artigo 78.

1. As deliberacións da CENG son reservadas. Faranse constar na acta os votos particulares que houbera sobre as decisións recaídas.
2. A proposta do Secretario/a Xeral, a CENG establecerá o seu réxime de funcionamento.
3. Os/as secretarios/as da CENG terán unha dedicación preferente ás tarefas da mesma, asumindo as funcións que se lles especifiquen no Regulamento de Funcionamento Interno, responsabilízanse destas ante o Comité Nacional e o Congreso, e participan na elaboración do informe de xestión.
4. As secretarías executivas estarán adscritas a unha Secretaría da CENG e poderán ter funcións específicas se así o determina a CENG.
5. A responsabilidade da CENG é colexiada, o que non exime aos seus membros da propia responsabilidade no desempeño das súas funcións.
6. O cese dos membros da CENG poderá producirse a petición propia ou por resolución do CNG. As vacantes ou cambios nas áreas de responsabilidade que se teñan

producido na CENG serán cubertas ou realizadas a proposta do/a Secretario/a Xeral e aprobadas polo CNG.

Artigo 79.

1. A CENG poderá designar Delegados/as Nacionais que actuarán, en nome da mesma, naquelas funcións que esta lle encomende, baixo a dependencia da Secretaría de Organización.

Os/As Delegados/as Nacionais poderán ser chamados pola CENG para informar nas súas reunións sobre os asuntos das súa competencia.

2. A CENG poderá constituír no seu seo comisións para asuntos específicos, podendo delegar facultades de decisión sobre os mesmos.
3. A CENG disporá dun Gabinete permanente e estable de Asistencia Técnica e Xurídica, suficientemente dotado de recursos materiais e humanos, ao servizo da Organización e dos Grupos Políticos do Partido nas distintas institucións galegas.
4. O CNG aprobará o regulamento interno da CENG, a proposta desta.

Artigo 80.

O Defensor do Militante é o órgano do Partido que velará polos dereitos, garantías e obrigas dos militantes contidos nestes Estatutos, Regulamentos e no Código Ético.

A Comisión Executiva elixirá unha persoa, como a súa comisionada, co cargo de Defensor do Militante. O Defensor do Militante será un afiliado con máis de dez anos de antigüidade.

Serán competencias do Defensor do Militante:

- a) A defensa do interese dos militantes. Para iso poderá solicitar, de oficio ou a instancia de parte, as informacións que considere oportunas dos órganos competentes.
- b) A emisión de informes, ditames e recomendacións para un mellor funcionamento dos órganos do PSdeG-PSOE.
- c) A emisión dun informe anual de actividade, coas recomendacións que se consideren, derivadas das actuacións practicadas, para a súa revisión pola CENG.

A condición de Defensor do Militantes é incompatible coa de membro da CENG, de calquera dos Órganos do Partido e con calquera persoa vinculada laboralmente á estrutura do Partido.

CAPÍTULO IV. CONSELLO TERRITORIAL

Artigo 81.

O Consello Territorial é un órgano Nacional ao que corresponde informar e asesorar sobre as políticas do Partido que afectan ao territorio e á cidadanía galega. O Consello Territorial será convocado polo Secretario Xeral da CENG.

Artigo 82.

O Consello Territorial está composto polo Secretario Xeral e unha representación da CENG, elixida en reunión ordinaria do seu Plenario, os/as catro Secretarios/as provinciais, os/as alcaldes/as ou portavoces socialistas das grandes cidades, un representante de cada estrutura comarcal do Partido, os Presidentes ou portavoces das Deputacións provinciais, o/a Presidente ou Vicepresidente socialista na FEGAMP, os/as representantes socialistas dos Grupos Parlamentarios galego, español e europeo, o/a Secretario/a Xeral das XSG.

CAPÍTULO V. COMISIÓN NACIONAL DE LISTAS

Artigo 83.

1. A Comisión Nacional de Listas está formada por membros da CENG e membros do CNG, elixidos por este de entre os seus membros. Nela, os membros elixidos polo Comité Nacional deberán ser maioría.
2. A Comisión Nacional de Listas será elixida despois da celebración do Congreso Nacional ordinario, a proposta da CENG, e estará vixente ata a celebración do seguinte Congreso.
3. Os seus membros non poderán pertencer a máis dunha Comisión de Listas.

Artigo 84.

A Comisión Nacional de Listas emitirá ditame previo á aprobación definitiva por parte do Comité Nacional dos/as candidatos/as e candidaturas nos diferentes procesos electorais, nos que así estea previsto na Normativa do Partido.

Para realizar as súas funcións:

- a) Dispoñerá dunha ampla información sobre a traxectoria persoal, profesional e política dos candidatos e candidatas para a valoración dos seus méritos.
- b) Contará con información sobre as necesidades de traballo e especificidade na composición dos Grupos Parlamentarios e Municipais.
- c) Oirá a XSG, co fin de promover a participación da mocidade nas candidaturas electorais.
- d) escoitará, nas cuestións que afecten ás súa circunscrición, o/a Secretario/a Xeral Provincial e a un/unha membro do Comité Provincial de entre os/as elixidos/as para a Comisión Provincial de Listas.

CAPÍTULO VI. COMISIÓN NACIONAL DE ETICA

Artigo 85.

1. O Congreso Nacional elixirá unha Comisión Nacional de Ética. Dita Comisión estará integrada por cinco membros e terá un Presidente/a e un Secretario/a.

2. A condición de membros da Comisión de Ética é incompatible cos cargos de membros das Executivas Federal, Nacional e Provinciais.
3. As vacantes que se poidan producir serán cubertas a proposta da CENG, debendo contar coa aprobación do CNG.
4. Os seus membros están obrigados a unha total reserva dos datos que figuran no rexistro de bens e actividades ou dos que tiveran coñecemento con motivo do exercicio de tal función. A informatización de datos farase con estrito cumprimento das disposicións legais aplicables

Artigo 86.

A Comisión Nacional de Ética será competente para:

- a) Desempeñar aquelas funcións que lle asigna o Regulamento Federal de Congresos nos procedementos de primarias para a elección da Secretaría Xeral no ámbito nacional e provincial.
- b) Supervisar e controlar as situacións patrimoniais dos e das afiliados/as socialistas e as actividades económicas dos cargos públicos electos/as ou designados/as polo PSdeG-PSOE.
- c) Velar polo cumprimento das normas sobre incompatibilidades de cargos públicos que sexan afiliados/as socialistas.
- d) Recibir as declaracións dos candidatos e candidatas en listas do Partido naqueles procesos nos que non sexan competente a Comisión Federal de Ética e Garantías.
- e) Supervisar e controlar as situacións patrimoniais dos/as afiliados/as socialistas e as actividades económicas dos cargos públicos electos/as ou designados/as polo PSdeG-PSOE.
- f) Garantir, no desempeño das súas funcións, a protección de datos e da información recibida.
- g) Requirir tanta información como sexa necesaria para o cumprimento do seu labor.
- h) Supervisar no ámbito da Comunidade Autónoma o cumprimento e aplicación do Código Ético do Partido.
- i) Elevar á dirección do Partido calquera anomalía que poida detectar, así como poñer en coñecemento do órgano competente condutas ou feitos sancionables, para instruír o correspondente expediente disciplinario.
- l) Realizar aquelas outras funcións que puidera delegar nela a Comisión de Ética e Garantías Federal.

Artigo 87.

1. A Comisión Nacional de Ética supervisará e controlará as situacións patrimoniais dos afiliados e afiliadas socialistas e as actividades económicas de cargos públicos electos ou designados polo PSdeG-PSOE. Así mesmo, fará un seguimento do cumprimento das normas sobre incompatibilidades de cargos públicos que sexan afiliados ou afiliadas socialistas.
2. Os cargos públicos e militantes do PSdeG-PSOE poderán acudir á Comisión Nacional de Ética cando foran difamados ou sexan obxecto de informacións tendenciosas sobre o seu patrimonio ou actividades, ao obxecto de que sexa a Comisión a que asuma a defensa da súa integridade e honestidade.

Artigo 88.

1. Todos os/as candidatos/as do PSdeG-PSOE en listas a Eleccións Xerais, Europeas, Autonómicas e Locais deberán presentar a declaración de bens e actividades con anterioridade á aprobación definitiva da lista polo órgano competente en cada ámbito e, tamén, no momento de finalizar o exercicio no cargo, de acordo cos formularios que se aproben a estes efectos.
2. Esta declaración tamén será esixida aos e ás militantes do partido que sexan designados para ocupar cargos públicos na Administración Autonómica con nivel igual ou superior a Director Xeral, debendo presentala ao comezo e ao cese das súas actividades.
3. O órgano competente poderá esixir que a declaración veña acompañada da copia da declaración do imposto da renda e, no seu caso, do patrimonio.
4. O incumprimento da obriga de presentar esta declaración poderá determinar a exclusión do candidato/a da lista.
5. A Comisión Nacional de Ética dará conta do incumprimento desta obriga aos órganos internos responsables da aprobación das candidaturas e, no seu caso, aos competentes en materia disciplinaria.
6. A Comisión Nacional de Ética poderá requirir de calquera afiliado/a que teña un papel politicamente relevante no Partido ou na sociedade, aínda cando non desempeñe un cargo público ou representativo, a presentación de declaracións sobre a súa situación patrimonial e actividades económicas, cando se dean situacións que o fagan necesario para garantir ante a sociedade a honorabilidade dos seus afiliados/as.
7. A Comisión Nacional de Ética, a instancia da CENG ou de oficio, escoitará a todo cargo orgánico ou electo que sexa obxecto de investigación xudicial e poderá recomendar, razoadamente, ao órgano competente a suspensión de dito cargo das súas funcións ou ben medidas de amparo do militante e de defensa dos intereses do Partido.

CAPÍTULO VII. COMISIÓN NACIONAL DE CONTROL ECONÓMICO

Artigo 89.

1. A Comisión Nacional de Control Económico é o órgano encargado de supervisar a contabilidade, verificar a administración dos medios económicos do PSdeG-PSOE e de controlar que o seu uso se adecúe ás resolucións dos órganos de dirección do Partido.
2. A aprobación da xestión económica dos bens e dereitos do PSdeG-PSOE corresponde ao Congreso Nacional e, subsidiariamente, ao Comité Nacional. A natureza fidedigna dos informes e cifras que presenta a Comisión Executiva Nacional quedará garantida pola Comisión Nacional de Control Económico.
3. O Congreso Nacional elixe á Comisión Nacional de Control Económico, que estará constituída por cinco membros e contará con un Presidente/a e un Secretario/a. A súa misión será a revisión semestral das contas da Tesourería do PSdeG-PSOE. Esta Comisión responde unicamente diante do Congreso Nacional, pero terá que emitir informes ao Comité Nacional cando este os solicite e, como mínimo, unha vez ao ano para o peche do exercicio económico que corresponda.
4. A Comisión de Control Económico, á solicitude da CENG, poderá emitir informes e ditames non vinculantes sobre aspectos concretos das contas do PSdeG-PSOE.
5. A condición de membro da Comisión Nacional de Control Económico será incompatible cos seguintes cargos:
 - Membro das Executivas Provinciais e Nacional do Partido.
 - Membro da Comisión de Ética.
 - Empregado/as do propio Partido.

TÍTULO V. EXPEDIENTES DISCIPLINARIOS

Artigo 90.

1. As Comisións Executivas Municipais ou, no seu caso, de Distrito e, subsidiariamente as Comisións Executivas Provinciais e Nacional, son competentes para instruír expedientes disciplinarios contra militantes, ben de oficio ou a instancia razoada de parte, axustándose ao previsto no Regulamento Federal dos Afiliados e Afiliadas.
2. Os expedientes referidos a condutas constitutivas de falta leve, resolveranse pola CENG. Contra as súas resolucións caberá recurso ante a Comisión Executiva Federal.
3. Nos supostos de expediente disciplinario por falta grave ou moi grave as Comisións Executivas que promovan o expediente remitirano á Comisión Executiva Federal, que resolverá. Contra as resolucións ditadas pola Comisión Executiva Federal, caberá recurso único de alzada ante a Comisión Federal de Ética e Garantías. As impugnacións que versen sobre a vida interna do Partido resolveraa a CEF.

Artigo 91.

Caberá a expulsión provisional do Partido acordada pola Comisión Executiva Federal ben a iniciativa propia ou a instancia da Executiva Nacional Galega e das Provinciais cando se produzan os seguintes supostos:

- a) Actuación en contra de acordos expresamente adoptados polos órganos de dirección do Partido.
- b) Cando se produzan supostos de actuacións gravemente irregulares que a xuízo da CEF merezan tal medida.
- c) Os previstos no artigo 8 dos Estatutos Federais, ata que se produza a suficiente acreditación da concorrencia das circunstancias persoais que dan lugar á perda da condición de afiliado ou afiliada.

Nestes casos tramitarase posteriormente o correspondente expediente disciplinario.

Artigo 92.

A CENG exercerá as competencias disciplinarias, que teña atribuídas no réxime disciplinario do Partido, sobre as persoas afiliadas no seu ámbito.

TÍTULO VI. CONFERENCIAS

Artigo 93.

1. O PSdeG-PSOE poderá celebrar, entre Congresos, Conferencias para cuestións políticas e sectoriais de especial transcendencia, cunha orde do día específica, e nas que participarán, con voz e voto, os/as militantes en representación dos ámbitos orgánicos, territoriais e sectoriais do Partido.
2. O órgano convocante das Conferencias será o Comité Nacional, a iniciativa propia ou a proposta da CENG. Na convocatoria determinarase o número de participantes, a súa distribución territorial e o obxecto da mesma.
3. A normativa aplicable para o desenvolvemento das Conferencias estará determinada pola súa propia convocatoria e, de forma supletoria, polo establecido no Regulamento de Congresos.

TÍTULO VII. CONSULTAS Á MILITANCIA

Artigo 94.

1. A Comisión Executiva Nacional do PSdeG-PSOE poderá convocar consultas á militancia sobre aqueles asuntos de especial transcendencia que se determinen regulamentariamente e que afecten ó seu ámbito territorial. A celebración destas consultas deberá ser previamente autorizada pola Comisión Executiva Federal.
2. En todo caso, será obrigatoria a consulta á militancia sobre os acordos de goberno nos que sexa parte o PSdeG-PSOE, ou sobre o sentido do voto en sesións de investidura que supoñan facilitar o goberno a outro partido político.

TÍTULO VIII. ADMINISTRACIÓN E PATRIMONIO DO PSdeG-PSOE

CAPÍTULO I. DISPOSICIÓN XERAIS

Artigo 95.

En materia de financiamento de partidos, o PSdeG-PSOE, ó configurarse como instrumento básico de formación da vontade popular e de representación política, posibilitará e promoverá os máximos niveis de transparencia e publicidade, e adoptará mecanismos de control que impidan a desviación das súas funcións, que serán permanentemente revisados no seu ámbito de actuación.

Artigo 96.

O PSOE, coa denominación de PSdeG-PSOE en Galicia, ostenta personalidade xurídica única no seu ámbito orgánico de actuación, con plena capacidade de obrar, sen prexuízo dos disposto na normativa que afecte aos grupos políticos nas diferentes institucións.

Artigo 97.

En materia de financiamento, o PSdeG-PSOE asume a normativa vixente en materia de financiamento dos partidos políticos en todo o relativo ós mecanismos de funcionamento da súa estrutura, ó sistema de control interno para garantir a adecuada intervención e contabilización de tódolos actos e documentos dos que se deriven dereitos e obrigas de contido económico, á xestión patrimonial, á xestión de recursos humanos, á xestión da financiación pública e privada, á formulación de contas, auditoría e fiscalización. Todo isto no marco da normativa que o PSOE dite en materia de administración, financiamento e contabilidade para as distintas instancias do Partido.

CAPÍTULO II PATRIMONIO DO PARTIDO E A SÚA XESTIÓN

Artigo 98.

1. O patrimonio do PSdeG-PSOE está constituído polos bens e dereitos de calquera clase, adquiridos por calquera título legal e indivisible. A expulsión ou dimisión dos militantes ou a disolución das Agrupacións Municipais, no seu caso de Distrito, ou Provinciais non implica ningún dereito a cotas de división do patrimonio que sempre é de exclusiva titularidade do PSdeG-PSOE.
2. Co fin de establecer un adecuado control en materia de administración do patrimonio, a titularidade corresponde ao Partido, será requisito inescusable para a formación de operacións de compra, venda, empeño ou hipoteca dos bens, o previo acordo expreso da CENG, que contará cun apoderamento para cada actuación concreta.

3. Son recursos económicos do Partido as cotas e achegas económicas dos/as militantes, os rendementos do seu patrimonio, o produto das actividades do Partido, as doazóns, legados e subvencións que reciba e os créditos que concerte.
4. Os xornais e revistas, así como outros medios de comunicación social que sexan propiedade do Partido, dependerán política e administrativamente, dos órganos de dirección nacionais.
5. Todo o patrimonio do Partido será de exclusiva titularidade do PSdeG-PSOE e, en ningún caso, se permitirá que aquel ou parte daquel estea baixo nome de persoa ou persoas particulares, aínda que sexan membros dos órganos de dirección. En caso de disolución do PSdeG-PSOE, os seus bens, dereitos e obrigacións pasarán ao PSOE.

Artigo 99.

A proposta da Secretaría de Organización da CENG e co informe previo, vinculante e favorable da Secretaría de Organización Federal, a CENG nomeará o Xerente do PSdeG-PSOE.

En todo o relativo á xestión económico-financeira do PSdeG-PSOE estarase ó previsto nos Estatutos e normativa federal do Partido, con especial mención do Regulamento de Control e Xestión, ou norma que o substitúa.

CAPÍTULO III . DOS PODERES

Artigo 100.

A CENG será a encargada de que se outorguen no seu ámbito cantos poderes sexan precisos para o correcto funcionamento e xestión no ámbito da administración e finanzas do Partido.

En ditos poderes, haberán de sinalarse detalladamente as facultades que se outorgan, de tal forma que permitan un adecuado funcionamento ordinario.

CAPÍTULO IV. PRESUPOSTOS, RECURSOS ECONÓMICOS E CONTABILIDADE

Artigo 101.

É competencia da CENG aprobar o proxecto de presuposto do PSdeG-PSOE, que se someterá o Comité Nacional para a súa definitiva aprobación.

A CENG, aprobará os presupostos para as eleccións (presupostos de campaña) sempre que os mesmas sexan de ámbito nacional galego.

Artigo 102.

Os recursos económicos do PSdeG-PSOE están constituídos polos recursos procedentes do financiamento público e do financiamento privado que se enumeran no artigo 2 da Lei orgánica 8/2007, do 4 de xullo, sobre financiamento dos partidos políticos.

A CENG ditará as normas, de obrigado cumprimento, en materia de administración, financiamento e contabilidade das distintas instancias do Partido en Galicia, dándose cumprido coñecemento das mesmas ao Comité Nacional.

Artigo 103.

Todas as contas bancarias dos diferentes órganos territoriais do Partido en Galicia estarán baixo o control e fiscalización da CENG.

Artigo 104.

A CENG poderá solicitar informes e ditames non vinculantes sobre aspectos concretos das contas do Partido, no seu conxunto, ou da contabilidade dalgún órgano en concreto.

Así mesmo, poderanse solicitar auditorías externas, cando así se considere necesario, para un detallado coñecemento das contas de que se trate.

Artigo 105.

A CENG, se as circunstancias así o requiren, poderá intervir, conforme as normas de Partido e á legalidade vixente, as contas de calquera órgano do PSdeG-PSOE sen prexuízo das responsabilidades nas que puideran haber incorrido os seus responsables.

Artigo 106.

En todo o referido á contabilidade e contratación o PSdeG-PSOE aplicará as normas internas do Partido e as previstas na normativa reguladora en materia de financiamento de partidos políticos e de control da súa actividade económico-financeira.

CAPÍTULO V. COTAS

Artigo 107.

A CENG asegura o seguimento e control das cotas de afiliación do Partido e das contribucións dos cargos públicos e institucionais.

Artigo 108.

1. A cota de afiliación será fixada anualmente polo Comité Federal a proposta da CEF.
2. As Agrupacións Municipais e, no seu caso de Distrito, por acordo da súa Asemblea e conforme ás normas do Partido e, no seu caso, coa autorización da CEF, poderán devolver unha parte das cotas dos militantes, correspondentes a estas, aos compañeiros e compañeiras pensionistas, xubilados/as, parados, ou outros casos xustificados, que polas súas especiais condicións económicas, así o soliciten de xeito razoado, motivado e xustificado.
3. A CENG poderá propoñer cotas extraordinarias para a súa aprobación polo CNG.

4. A CENG poderá propoñer ao Comité Nacional para a súa aprobación, unha cota especial para os cargos de representación do Partido ou asimilados, así como a norma para fixar a contía e os mecanismos de revisión da mesma.

TÍTULO IX. PROCEDEMENTOS ELECTORAIS

CAPÍTULO I. SELECCIÓN DE CANDIDATOS E CANDIDATAS

Artigo 109.

A elaboración das listas dos candidatos e candidatas do PSdeG-PSOE ás eleccións lexislativas, locais, autonómicas e diversos cargos públicos ás institucións, basearase nos seguintes principios:

- a) A igualdade de todos os afiliados e afiliadas para acceder aos cargos públicos dependentes do Partido.
- b) A representatividade e proxección social dos candidatos e candidatas.
- c) O Principio de mérito que asegure a selección dos compañeiros e compañeiras máis capacitados/as.
- d) A renovación periódica e gradual no exercicio das funcións públicas, evitando a acumulación de cargos tanto orgánicos como institucionais.
- e) O cumprimento do principio de democracia paritaria.
- f) As Comisións de Listas dispoñerán dunha ampla información sobre a traxectoria persoal, profesional e política dos candidatos e candidatas e establecerán mecanismos de valoración obxectiva dos méritos.

Artigo 110.

No relativo ó procedemento a seguir para a elección de candidatos/as nos procesos electorais referidos no artigo anterior; á competencia dos órganos do PSdeG-PSOE na elaboración das candidaturas; e á organización e funcionamento dos órganos que supervisen estes procedementos, estarase ó que se estableza na normativa de desenvolvemento dos Estatutos Federais.

Artigo 111.

Co fin de potenciar a participación dos militantes do Partido e facer rendible ao máximo o seu traballo político nas institucións, evitárase a acumulación de cargos públicos e orgánicos nunha mesma persoa.

Artigo 112.

1. Os afiliados e afiliadas do PSdeG-PSOE, ademais das incompatibilidades específicas entre cargos que se establecen nos Estatutos do Partido, non poderán desempeñar, simultaneamente, máis dun cargo institucional o público de elección directa, salvo que exista un informe motivado da CENG para casos excepcionais.
2. Un/unha afiliado só poderá ter un cargo orgánico executivo salvo que sexan inherentes ou derivados do cargo ou función principal ou un deles sexa formar parte

da Comisión Executiva Municipal ou de distrito. En todo caso, será incompatible ocupar un cargo nas Comisións Executivas Provinciais ou Nacional e ser membro da Comisión Executiva Federal.

3. Ningún cargo orgánico executivo poderá ser ocupado pola mesma persoa durante máis de tres mandatos consecutivos, salvo cando, no caso da Secretaría Xeral, o seu titular exerza a Presidencia de Goberno da Xunta de Galicia.

CAPÍTULO II. COMISIÓN NACIONAL DE GARANTÍAS ELECTORAIS

Artigo 113.

A Comisión Nacional de Garantías Electorais é un órgano permanente que se renova na primeira reunión do Comité Nacional tras o Congreso do Partido. O seu mandato finalizará coa renovación da Comisión de Garantías Electorais.

Artigo 114.

A Comisión Nacional de Garantías Electorais exercerá as súas funcións nos procesos electorais previstos no Regulamento Federal de Primarias.

Terá as seguintes competencias:

- a) Supervisar a actividade do Comité Organizador Nacional.
- b) Interpretar unha vez iniciado o proceso, a normativa aplicable e ditar cantas instrucións sexan precisas, de obrigado cumprimento, ao resto de integrantes da autoridade electoral no curso do proceso.
- c) Cursar instrucións e revogar de oficio instrucións, acordos ou decisións de outras Comisións Electorais Provinciais, cando se opoñan a súa interpretación e directrices ou ás da Comisión Federal de Garantías Electorais.
- d) Resolver con carácter vinculante as consultas que lle realicen as Comisións Provinciais de Garantías Electorais.
- e) Resolver queixas, reclamacións e recursos que se lle dirixan conforme ó Regulamento Federal de Primarias e á normativa interna.

Artigo 115.

1. A Comisións Nacional de Garantías Electorais está composta por catro membros elixidos pola Comisión Executiva Nacional e por cinco representantes do Comité Nacional, elixidos por este órgano, a proposta da CENG ou dun terzo dos membros do Comité Nacional.
2. Na súa primeira reunión tras cada renovación, A Comisión Nacional de Garantías Electorais elixirá, de entre os seus membros, unha Presidencia e unha Secretaría.

3. A condición de membros da Comisión Nacional de Garantías Electorais é incompatible coa condición de precandidato, precandidata, candidato, candidata ao proceso de primarias; coa pertenza á plataforma de apoio a calquera das candidaturas e coa condición de representante, interventor ou apoderado das mesmas.
4. Os membros da Comisión Nacional de Garantías Electorais non poderán avalar a ningún dos/as precandidatos/as, nin mostrar públicamente o seu apoio a ningunha das candidaturas.

Artigo 116.

A Comisión Nacional de Garantías Electorais ten a súa sede no local da CENG, na rúa do Pino, 1-9, baixos, en Santiago de Compostela.

Artigo 117.

Naqueles aspectos relativos á Comisión Nacional de Garantías Electorais que non están regulados nos presentes Estatutos será de aplicación o establecido no Regulamento Federal de Primarias.

TÍTULO X. CARGOS PÚBLICOS DO PSdeG-PSOE

Artigo 118.

A selección de candidatos e candidatas do PSdeG-PSOE a cargos públicos, realizarase de conformidade cos Estatutos do Partido e coa Normativa Federal Reguladora dos Cargos Públicos.

Artigo 119.

1. En cada circunscrición, crearase un Gabinete Parlamentario de Relacións coa Sociedade ou unha Oficina Parlamentaria de Relacións coa Sociedade, formadas por parlamentarios europeos, nacionais, autonómicos e deputados provinciais, en colaboración coas correspondentes áreas organizativas e institucionais, co fin de potenciar o diálogo social e a conexión dos parlamentarios e parlamentarias cos movementos sociais e coa cidadanía.
2. Os/as Deputados/as e Senadores/as darán conta, anualmente, da súa xestión diante dos órganos da súa circunscrición.
3. Os cargos institucionais procurarán ter una axenda diaria que poderá ser publicada nas páxinas web do partido e da institución correspondente.

Artigo 120.

1. Os/as Deputados/as e Senadores/as e Eurodeputados/as do PSdeG, en asuntos específicos de Galicia, acatarán os acordos do Comité Nacional e da Comisión Executiva Nacional Galega.
2. Para os membros do Partido elixidos noutros ámbitos da actividade política ou que ocupen altos cargos na Administración, seguiranse os criterios establecidos para os parlamentarios, tanto no terreo político como no económico.

Artigo 121.

1. Os afiliados/as do Partido que ocupen cargos públicos ou institucionais, en representación deste, estarán obrigados a facer unha achega económica mensual en función dos criterios establecidos polo CNG.
2. A asignación e emolumentos que perciban os membros do Grupo Parlamentario dos Socialistas de Galicia, Deputados, Senadores, Eurodeputados/as e Deputados Provinciais, ingresaranse no Partido segundo os criterios marcados pola CENG, de acordo coas Normas que resulten de aplicación.
3. O CNG, a proposta da CENG, fixará as cotas que deberán aboar ao Partido os Cargos Públicos e Institucionais, así como os órganos territoriais que se beneficiarán de ditos ingresos, de acordo coas Normas do Partido que resulten de aplicación.

4. As asignacións económicas individuais e colectivas que se perciban por calquera concepto no desempeño do cargo público, terán que axustarse ó establecido na lexislación que resulte de aplicación, no marco dunha maior transparencia e compromiso de servizo público. No caso dos ingresos que se poidan facer ó Partido deberán de axustarse ós Estatutos e normas establecidas ó respecto e, sempre, dentro da máis estrita legalidade.

Artigo 122.

Os e as militantes que ocupen cargos públicos ou institucionais, deberán cumprir, obrigatoriamente, o réxime de incompatibilidades establecido polo Partido, segundo o principio “unha persoa un cargo”. Do seu incumprimento, derivaranse as actuacións previstas no Réxime Disciplinario do Partido.

As/os socialistas, con cargo de representación institucional, están obrigados a cumprir coas resolucións e programas electorais aprobados polos órganos do partido. Os compromisos deben cumprirse. A credibilidade e a confianza dos militantes, simpatizantes e votantes gánase e susténtase na firmeza con posicións aceptadas lexitimamente pola nosa organización política.

Se estivese xustificado o non cumprimento, por razón de forza maior, daranse as explicacións oportunas diante da militancia e do electorado. En todo caso a militancia no nivel correspondente, se vira inxustificado o incumprimento podería censurar aos responsables e esixirlles a dimisión dos seus cargos.

TÍTULO XI. GRUPOS POLÍTICOS DO PSdeG-PSOE

CAPÍTULO I. GRUPO PARLAMENTARIO

Artigo 123.

1. O Grupo Parlamentario do Partido dos Socialistas de Galicia é o soporte parlamentario permanente do Goberno cando este está presidido polos socialistas, e debe explicar suficiente e fondamente á sociedade e á militancia, en particular, as reformas realizadas dende as institucións administradas polos socialistas.
2. O Grupo Parlamentario do PSdeG-PSOE renderá xestión, anualmente, ante o Comité Nacional Galego e por conduto da CENG.
3. O Grupo Parlamentario dos Socialistas de Galicia está constituído por todos os candidatos e candidatas elixidos nas eleccións ao Parlamento de Galicia. Todos os cargos públicos en representación do Partido que estean remunerados por tal responsabilidade, ingresarán na CENG o importe dos honorarios que se fixen regulamentariamente.
4. Os membros do Grupo Parlamentario do PSdeG-PSOE asumen e están obrigados a acatar a declaración de principios, programas e resolucións aprobadas no Congreso Nacional do Partido, así como as directrices emanadas dos órganos de dirección do Partido, da CENG e do CNG.
5. A efectos orgánicos, os membros do Grupo Parlamentario Socialista continuarán vinculados ás súas unidades orgánicas, aínda cando dependan do CNG e, no seu defecto, da CENG respecto da súa actividade no Parlamento.
6. Todos os membros do Grupo Parlamentario do PSdeG-PSOE aceptan o compromiso de presentar a súa dimisión ao Presidente do Parlamento de Galicia se unha vez elixidos causan baixa no PSdeG-PSOE por calquera circunstancia.
7. Os membros do Grupo Parlamentario están suxeitos á unidade de actuación e disciplina de voto. Se non a respectasen, o Grupo Parlamentario e a CENG poderán denunciar a súa conduta ante o CNG.
8. Aqueles parlamentarios e parlamentarias que non estean afiliados ao PSdeG, pero que desexen adscribirse ao Grupo Parlamentario do PSdeG, poden facelo sempre que acepten o establecido nestes Estatutos, previa proposta do Presidente do Grupo que aprobe a CENG e sexa tratada polo CNG, e sometido á ratificación do mesmo. En ningún caso poderán representar ao Grupo Parlamentario do PSdeG.
9. O Grupo Parlamentario Socialista elixirá de entre os seus membros un/ha Portavoz, un/ha Presidente/a e un/ha Secretario/a, así coma os membros da Permanente que fixe o seu respectivo Regulamento de Funcionamento, previa proposta da CENG.

Artigo 124.

1. As asignacións económicas individuais e colectivas que perciban os e as membros do Grupo Parlamentario, por calquera concepto no desempeño do cargo público, terán que axustarse ao establecido na lexislación que resulte de aplicación, no marco da maior transparencia posible.
2. Así mesmo, o Grupo Parlamentario e os Deputados e Deputadas que o conforman ingresarán na CENG os importes que regulamentariamente se fixen, sempre dentro da máis estrita legalidade.

CAPÍTULO II. GRUPOS SOCIALISTAS NAS CORPORACIÓNS LOCAIS

Artigo 125.

1. Os Deputados Provinciais e os Concelleiros e Concelleiras electos/as nas listas socialistas constitúen os Grupos Socialista nas Corporacións Locais e Provinciais.
2. O grupo Socialista ten capacidade para tomar decisións e levalas a cabo no seu ámbito de actuación, sempre de acordo cos obxectivos sinalados nos Programas electorais, as Resolucións dos Congresos do Partido e os acordos emanados dos Órganos do Partido competentes en cada caso.
3. Os membros do Grupo Socialista da Corporación explican e dan conta, anualmente, da súa actuación diante dos órganos executivos do Partido.
4. Ás reunións do Grupo Municipal poderá asistir o responsable da Secretaría de Política Municipal da Comisión Executiva Municipal.
5. No caso dos Grupos Socialistas nas Deputacións Provinciais, poderá asistir o Secretario de Política Municipal da Executiva Provincial e da CENG.
6. Cada Grupo ten a súa Portavocía, que é elixida polo propio Grupo de entre os seus membros. Ostenta a representación na Corporación, e fala en nome daquel cando teña que fixar a súa posición. En ningún caso se acumularán os cargos de Portavoz e alcalde/esa, ou Presidente/a da Deputación.

O Grupo, tamén elixirá un membro que actúa de Secretario/a do mesmo.

7. A Comisión Executiva Municipal poderá propoñer candidatos/as par os cargos de Portavoz e Secretaría do Grupo.

As posibles discrepancias, que sobre o nomeamento dos cargos de Portavoz ou Secretario/a, poidan xurdir entre o Grupo Socialista da Corporación e a Organización do Partido, serán sometidas á arbitrase da Comisión Executiva Provincial. Cabe recurso diante da CENG en primeira instancia e da CEF, en segunda.

Artigo 126.

As asignacións económicas individuais e colectivas que se perciban por calquera concepto no desempeño do cargo público nas Corporacións Locais, terán que axustarse ao establecido na lexislación que resulte de aplicación, no marco da maior transparencia posible. No caso dos ingresos que se poidan facer ao Partido deberán de axustarse aos Estatutos e normas establecidas ó respecto e, sempre, dentro da máis estrita legalidade.

TÍTULO XII. XUVENTUDES SOCIALISTAS DE GALICIA

Artigo 127.

1. As Xuventudes Socialistas de Galicia constitúen a Organización Xuvenil do PSdeG-PSOE e, como tal, tanto os seus órganos de dirección coma os seus militantes están obrigados a aceptar e cumprir o programa e resolucións do Congreso Nacional, a estratexia global, os principios ideolóxicos aprobados nos Congresos e os acordos adoptados polo CNG e pola CENG.

Artigo 128.

1. Os e as militantes de Xuventudes Socialistas que militan ao mesmo tempo no PSdeG-PSOE teñen todos os dereitos e deberes que figuran nos Estatutos.
2. As Comisións Executivas Municipais ou de Distrito impulsarán a incorporación ás XSG da mocidade afiliada ó Partido.

Artigo 129.

As XSG teñen autonomía na súa Organización de base, concretada na súa posibilidade de celebrar os seus Congresos e da elección de órganos de dirección a todos os niveis, se ben as súas resolucións terán que ser referendadas polos órganos de dirección do PSdeG-PSOE, a fin de que non existan contradicións.

Artigo 130.

1. As XSG terán representación nos órganos executivos do Partido por medio do/a Secretario/a Xeral do ámbito correspondente con voz e voto. Os militantes ás XSG poderán asistir ás Asembleas das Agrupacións Municipais do PSdeG-PSOE, con voz pero sen voto.
2. O PSdeG-PSOE terá como obxectivo incorporar á mocidade ás institucións públicas galegas, froito dun compromiso de pacto interxeneracional (Concellos, Deputacións, Parlamento Galego e Xunta de Galicia).
3. As Comisións Executivas Municipais do Partido impulsarán a creación de Agrupacións Municipais de XSG. A CENG informará semestralmente ás XSG das altas de mozos e mozas no PSdeG-PSOE nas diferentes localidades co fin de que as mocidades do Partido procedan á constitución formal da respectiva agrupación municipal das XSG.
4. O PSdeG-PSOE debe prestar un apoio decidido e colaboración con organizacións estudantís afíns ao Partido, en especial aquelas ligadas ás XSG, como é o caso da IESGA e fomentará a creación e fortalecemento dunha organización estudantil con espazo propio na comunidade educativa galega, autónoma no seu funcionamento, pero fondamente comprometida co proxecto socialista, para recuperar un espazo na Universidade e no ensino en xeral.

Artigo 131.

1. As XSG, en coordinación co PSdeG-PSOE, terán a tarefa de participar na elaboración da política socialista para a mocidade. A tal efecto, crease unha Comisión de Xuventude formada por membros das respectivas Executivas Nacionais, de xeito paritario, co fin de avalialas necesidades da mocidade e as respostas a dar nos diferentes foros ou institucións.
2. O PSdeG-PSOE colaborará de forma regular, económica e politicamente, coas XSG, e incorporará unha partida económica no seus presupostos a tal fin.
3. Como organización xuvenil do PSdeG-PSOE, poderán utilizar para o desenvolvemento da súa actividade, os medios materiais dos que dispoña o Partido, previa autorización da CENG, e/ou outras direccións políticas nos diferentes ámbitos territoriais e orgánicos.

Artigo 132.

1. A participación das XSG, con voz e voto nos Congresos e Conferencias do Partido a nivel nacional e provincial determinarase en base ao seu censo regularizado segundo o procedemento establecido para o censo do Partido e baixo a supervisión da Secretaría de Organización, utilizando o mesmo baremo que o aplicado para o resto do Partido.
2. As secretarías de Organización do PSOE e das JSE emitirá a oportuna certificación de cada ámbito territorial. En todo caso a representación das XSG será, como mínimo, do 2% e como máximo do 5% dos representantes en ditos Congresos ou Conferencias.

DISPOSICIÓNS ADICIONAIS, TRANSITORIAS E FINAIS

DISPOSICIONS ADICIONAIS

Disposición Adicional Primeira.

En todo o non previsto nos presentes Estatutos, aplicarase con carácter supletorio, os Estatutos Federais e os Regulamentos e normas que os desenrolen.

O Comité Nacional queda facultado para incorporar, no seu caso, as correccións que o Comité Federal poida introducir nos Estatutos e normas federais do Partido.

Disposición Adicional Segunda.

O/A Secretario/a xeral electo de acordo co establecido no artigo 5.1 b dos presentes Estatutos elaborará e remitirá á Comisión do Congreso que corresponda unha proposta de estrutura da CENG co fin de que se incorpore ó correspondente ditame.

Disposición Adicional Terceira.

Os baremos e porcentaxes establecidos nos Estatutos do Partido e na normativa de desenrolo, en relación coa participación e representación das Organizacións Sectoriais e das XSG nos diferentes ámbitos territoriais, non poderán ser modificados.

DISPOSICIÓNS TRANSITORIAS

Disposición Transitoria Primeira.

Ós efectos previstos nos artigos 111 e 112, mentres non se redacte un Regulamento ou outra normativa que desenrole o réxime de Incompatibilidades, o procedemento para dar cumprimento ó establecido no apartado 1 do artigo 112 destes Estatutos, no caso de inclusión en listas electorais que poidan dar lugar a situacións de incompatibilidade, será o seguinte:

1. O cargo institucional do PSdeG-PSOE que con motivo da súa inclusión nunha lista electoral poida incorrer nunha incompatibilidade, terá que presentar, diante do órgano que corresponda, compromiso escrito de renuncia a un dos cargos incompatibles. De non facelo, no poderá formar parte da candidatura que se presente diante da Xunta Electoral correspondente.
2. No caso de resultar electo/a a renuncia formal ó cargo incompatible, farase efectiva no momento no que se tome posesión do novo cargo institucional.
3. O incumprimento do compromiso de renuncia dará lugar a que a CENG inicie, de inmediato, as actuacións necesarias para aplicarlle as medidas disciplinarias que procedan, de acordo co previsto nos Estatutos e normas do Partido que resulten de aplicación.

4. A CENG establecerá como aplicar este procedemento en cada proceso electoral, tendo en conta as especificidades concretas de cada un deles, prevalecendo sempre os intereses xerais do Partido.

Disposición Transitoria Segunda.

O Congreso Nacional Galego mandata ó CNG a realización dun estudo en profundidade sobre unha nova comarcalización do PSdeG, sobre do previsto na Disposición Final Primeira.

Disposición Transitoria Terceira.

A elección dos membros dos Comités Provinciais e Nacional tal como está prevista nos artigos 5.2a.(ii) e 31.2 dos Estatutos Federais entrará en vigor unha vez celebrados os Congresos Nacional e Provinciais posteriores ó 39º Congreso Federal que, en consecuencia, elixiranse polas normas vixentes con anterioridade ó 39º Congreso Federal.

DISPOSICIONS FINAIS

Disposición Final Primeira.

As comarcas ós efectos do previsto nos artigos 34 e 35 deste Estatutos son as seguintes:

PROVINCIA DE A CORUÑA

BARBANZA

Boiro, Dodro, Lousame, Mazaricos, Muros, Noia, Pobra do Caramiñal, Outes, Padrón, Porto do Son, Rianxo e Ribeira.

BERGANTIÑOS

Cabana, Carballo, Coristanco, Laracha, Laxe, Malpica e Ponteceso.

COMPOSTELA

A Baña, Ames, Boqueixón, Brión, Negreira, Ordes, Oroso, Pino, O, Rois, Santa Comba, Santiago, Teo, Tordoia, Touro, Trazo, Val do Dubra e Vedra.

A CORUÑA

A Coruña, Arteixo, Cambre, Carral, Cerceda, Culleredo, Oleiros e Sada.

COSTA ATLÁNTICA

Camariñas, Carnota, Cee, Corcubión, Dumbría, Fisterra, Muxía, Vimianzo e Zas.

FERROL

A Capela, As Pontes, Ares, Cabanas, Fene, Ferrol, Mugardos, Narón, Neda, Pontedeume, San Sadurniño, Somozas e Valdoviño.

INTERIOR CORUÑÉS

Arzúa, Boimorto, Frades, Melide, Mesía, Santiso, Sobrado, Toques e Vilasantar.

MARIÑAS BETANCEIRAS

Abegondo, Aranga, Bergondo, Betanzos, Coirós, Curtis, Irixoa, Miño, Monfero, Oza-Cesuras, Paderne e Vilarmador.

ORTEGAL

Cariño, Cedeira, Cerdido, Mañón, Moeche e Ortigueira.

PROVINCIA DE LUGO

LE MOS

Bóveda, Folgoso do Caurel, Monforte, O Saviñao, Pantón, Pobra de Brollón, Quiroga, Ribas de Sil e Sober.

LUGO

Baralla, Castroverde, Corgo, Friol, Guntín, Lugo, Outeiro de Rei e Portomarín.

MARIÑA LUGUESA

A Pontenova, Alfoz, Barreiros, Burela, Cervo, Foz, Mondoñedo, O Valadouro, O Vicedo, Ourel, Ribadeo, Riotorto, Trabada, Vilanova de Lourenzán, Viveiro e Xove.

MONTAÑA LUGUESA

A Fonsagrada, As Nogais, Baleira, Becerreá, Cervantes, Navia de Suarna, Negueira de Muñiz, Pedrafita, Ribeira de Piquín e Triacastela.

SARRIA

Láncara, O Incio, O Páramo, Paradela, Samos, e Sarria.

SUROESTE LUGUÉS

Antas de Ulla, Carballedo, Chantada, Monterroso, Pallas de Rei e Taboada.

TERRA CHA

Abadín, Begonte, Castro de Rei, Cospeito, Guitiriz, Meira, Muras, Pastoriza, Pol, Rábade, Vilalba e Xermade.

PROVINCIA DE OURENSE

BANDE

Bande, Calvos de Randín, Entrimo, Lobeira, Lobios, Muíños e Vereá.

CARBALLIÑO-RIBEIRO

Arnoia, Avión, Beade, Beariz, Boborás, Carballeda de Avía, Carballiño, Castrelo de Miño, Cenlle, Irixo, Leiro, Maside, Melón, Piñor, Punxín, Ribadavia, San Amaro e San Cristobo de Cea.

CELANOVA

A Bola, A Merca, Cartelle, Celanova, Cortegada, Gomesende, Padrenda, Pontedeva, Quintela de Leirado e Ramirás.

A LIMIA

Baltar, Blancos, Porqueira, Rairiz de Veiga, Sandiás, Sarreaus, Trasmiras, Vilar de Barrio, Vilar de Santos e Xinzo de Limia.

OURENSE

A Peroxa, Allariz, Amoeiro, Baños de Molgas, Barbadás, Coles, Esgos, Maceda, Nogueira de Ramuín, Ourense, Paderne, Pereiro de Aguiar, San Cibrao das Viñas, Taboadela, Toén, Vilamarín, Xunqueira de Ambía e Xunqueira Espadañedo.

TRIVES-CALDELAS

Castro Caldelas, Chandrexa de Queixa, Manzaneda, Montederramo, Parada de Sil, Pobra de Trives, San Xoán de Río, Teixeira e Vilariño de Conso.

VALDEORRAS

A Rúa, A Veiga, Carballeda, Larouco, O Barco, O Bolo, Petín, Rubiá, Viana do Bolo e Vilamartín.

VERÍN

A Gudiña, A Mezquita, Castrelo do Val, Cualedro, Laza, Monterrei, Oímbra, Ríos, Verín e Vilardevós.

PROVINCIA DE PONTEVEDRA

AROUSA

A Illa de Arousa, Cambados, Catoira, O Grove, Meaño, Meis, Ribadumia, Sanxenxo, Vilagarcía e Vilanova.

BAIXO MIÑO-PORRIÑO

A Guarda, O Porriño, O Rosal, Oia, Salceda de Caselas, Tomiño e Tui.

CONDADO-PARADANTA

A Cañiza, As Neves, Arbo, Covelo, Crecente, Mondariz, Mondariz-Balneario, Ponteareas e Salvaterra de Miño.

DEZA

Agolada, Dozón, Lalín, Rodeiro, Silleda e Vila de Cruces.

MORRAZO

Bueu, Cangas, Marín, Moaña e Vilaboa.

PONTEVEDRA

A Lama, Cerdedo-Cotobade, Forcarei, Fornelos de Montes, Pontecaldelas, Poio, Pontevedra e Soutomaior.

ULLA-UMIA

A Estrada, Barro, Caldas de Reis, Campo Lameiro, Cuntis, Moraña, Pontecesures, Portas e Valga.

VIGO

Baiona, Gondomar, Mos, Nigrán, Pazos de Borbén, Redondela e Vigo.

Disposición Final Segunda.

Os presentes Estatutos foron adaptados aos Estatutos Federais do 39º Congreso Federal, celebrado en Madrid os días 16, 17 e 18 de xuño de 2017 e ós aprobados no 13º Congreso Nacional do PSdeG-PSOE, celebrado en Santiago de Compostela os días 27, 28 e 29 de outubro de 2017.

Disposición Final Terceira.

Os Estatutos do Partido estarán desenrolados, no seu caso, polas normas e Regulamentos de ámbito galego que aprobe o Comité Nacional a proposta da Comisión Executiva do PSdeG-PSOE.

Disposición Final Cuarta.

O Comité Nacional queda facultado para aprobar as modificacións que haxa que introducir nestes estatutos como consecuencia dos cambios que aprobe o Comité Federal a través do Regulamento Federal de desenrolo do Estatutos do Partido aprobados no 39º Congreso Federal.

Disposición Final Quinta.

Estes Estatutos entran en vigor con carácter inmediato unha vez aprobados polo 13º Congreso Nacional Galego en todo o seu articulado.

